

JA MYIDU'UKPI NØKY MIDI JA PABLO TYANIGAJX JA CORINTI JAA'Y

*Ku ja Pablo tnijayi ja janchja'wibi jaa'dyi pønjam
Corinti tsinaadyip*

¹ Øts idø'øn Pablo'ajtp. Tø øts ja Dios Teety xamidsøky jøts øts tø xwaqadsøy jøts øts ja Jesucristo ngudanaabyilatt. Møøt ja Sóstenes, pøn nayide'en tjanchja'wip ja Jesucristo, ² ixyam ø nnijayi ja Corinti jaa'y pøn jaty ja Dios Teety tø tnijawidi jøts tø tkupøkti ja chojkin ja pya'ayo'owin møøt ja y'ana'amin Cristo Jesús køjxp. Pø ja Dios Teetyxi meets tø mwí'ijxyidi jøts ja amuum xamiyoxtit ja mdsinää'yindi møøt nayide'en pøn jaty ja tjanchja'wyimidi, pøn jaty tkajpxpatmidip ja nwindsøn'ajtim Jesucristo, pø tum ja'axi amuki nwindsøn'ajtyindip nixem niyam. ³ Pajtidì kupøjkidi ja Dios Teety y'øy'ajtin kyuu'kxin møøt nayide'en ja nwindsøn'ajtim Jesucristo yja'.

Sa ja kunuu'kxin yikpaaty Cristo køjxp

⁴ Ejtp øts ja Dios Teety ndamøjawi ndakunuu'kxyjawí ku meets ja kunuu'kx'ajtin tø xpaaty Cristo Jesús køjxp. ⁵ Paty meets ja Dios Teety ja møj øy'ajtin janch kajaa tø mmø'øyi jøts øy tsuj xjajtidi uk xnimadyajkidi ja y'øy'ajtin ja kyuu'kxin ja'agøjxp ku ja Cristo yja' tø xpabøjkidi. ⁶ Tø meets idø'øn ja xjanchyikwindiy sa jaty ja Cristo tø yiknimadya'aky. ⁷ Ku meets

jade'en mdsøenit mmo'ojidipts ja Dios pøni ti dø'øn ja ttamidsojkp, ixa mee x'awijxy ja xøøw ja jumøjt ku ja nwindsøn'ajtim Jesucristo ñønky'ejxpaaqdiyit jadigojk. ⁸ Ja Diosts ja møk'ajtin mmo'ojidip jøts tu'ugyi mdsinaa'yin xyik'ettit, jøts wyinaty niti mgayiktaniwanbatti ku ja nwindsøn'ajtim Jesucristo jya'att. ⁹ Pyadumpy ja Dios ejtp ja y'ayuujk. Ja'ats tø mwaaqdsøyidi jøts ja y'U'nk xmøøtsinaajyidit, ja nwindsøn'ajtim Jesucristo.

Ja' ñi'ane'empy jøts tu'ugyi chøønidit

¹⁰ Migu'uktøjkti, nwindsøn'ajtim Jesucristo køjxp meets idø'øn n'amidøy jøts ka'pxy xu'undit jøts tu'ugyi mdsinaa'yin xpikta'aktit xyik'ettit. Kidi ki'abiky mdsøenidi, tu'ugyi winmaa'ñ xmøøt'attit jøts tu'ugyi xmøøt'attit midi mdajotigø'ødyip. ¹¹ ¿Ti ø migu'uktøjk idø'øn jade'en xyikwamp? Ja'agøjxp øts idø'øn jade'en nwaa'ñ kuts ja Cloé myigu'uk yø xukmadowdi ku meets jam mnamyijotma'adyidi. ¹² Yide'en øts idø'øn tø nyiktukmadøy ku mee tumdigach ja m'ayuujk; nømbik mum wya'aandi: "Øts ja Pablo møøt", jødsik ñømidi: "Øts ja Apolos møøt"; uk nømidiptsik: "Øts ja Pedro møøt"; jødsik jam ñømidi: "Øts ja Cristo møøt." ¹³ ¿Sudsots idø'øn, uk tø dø'øn ja Cristo may ñawya'kxyi? ¿Ti tø meets ja Pablo mgu'oogiyi kruskøjxp? ¿Uk Pablo køjxp meets idø'øn tø mnøbety? ¹⁴ Ngajxajkpy øts ja Dios kuts ja'ayi tø nyiknøbety ja Crispo jøts ja Gayo, meets ja mjaa'y; ¹⁵ jøts jade'en mgawa'andit ku mee tø mnøbety øts køjxp. ¹⁶ Ixa njaaqja'myech jadu'uk jøøn jadu'uk tøjk kuts ja Estéfanas nayıde'en tø nyiknøbety, jøts jade'eñi niþønxi øts jyawi tø njaga'ukyiknøbajtni. ¹⁷ Ja'agøjxp

øts idø'øn jade'en tø n'adi'ich ku øts ja Cristo tø xkakexy yiknøbatpi, ja'axi øts ja xaniguexy jøts øts ja ja'a'y ndukmado'ot ja nitsoojkin ayuujk, ka'ats øts ja janchkajajtni nnigajpxy sam ja ixpiky ja'a'y myadya'akti, jøts ja Cristo ja y'o'jkin jam kruskøjxp ejtp yikmøjpikta'akt.

Cristo, Dios Teety myøk'ajtin wiyijy'ajtin ja'

18 Ku yjayikni madya'aky ja Cristo y'o'jkin jam kruskøjxp, løki o'jkin ja ja'a'y ja ttejti pøn tø yiktanibikta'agidi jøts ja øy'ajtin tkapaattit; pønts ja Dios tø tkupøjkidi ja nitsoojkin ja pya'ayo'owin ka'ap ja jade'en wya'andi, nømp ja wya'andi jøts ku Dios myøk'ajtin jade'en tyiknigaxi'iky. **19** Pø yide'enxi ja nøky wya'añ midi jap jaabyety ejtp: Ka' øts ja y'ixpiky'ajtin ja wiyij ja'a'y nmøjpikta'ajkit, jits ka'ap ø ngupøjkit ja nimado'owin ku øts ja nimadoobi ja'a'y xjamigajpxmit.

20 ¿Mats idø'øn ja ixpiky ja'a'y tyundi, jøts ja yik'ixpøjkpidi, jøts ja ja'a'y pøn tnigajpxtip tnimadya'aktip ti jaty ya tuujnip na'xwiin? Kawejin kakajinxí ja Dios ja tø tyikwimbijty midi ya na'xkjxy yiktejp wejin kajin. **21** Wa'qats Dios tnijawi jøts ku ka'ap pøn myi'abaqadyiyi ja wiyij'ajtin sam ja wiyij ja'a'y yjawinmaadya'an pøn tkagupøjktip ja'abi winmaq'ñ. Ja' ja ne'egi tyukpaatp tyuk'ejxp ja nitsoojkin pøn ja kupøjkxiyip ja kyajpxy ja y'ayuujk tu'ugyi amumjoojt, øy ja yjadu'ukpi wine'en tja'abaxti ja'abi kajpxy ja'abi madya'aky.

22 Tum ja ijxyimbi ka'ijxyimbi ja israelit ja'a'y chojktip, jøts ja griegit ja'a'y t'amidomidi ja wejin ja kajin; **23** ja Cristots øø nnigajpxpy ku ja

kruskøjxp tø y'øøky. Nachø'ødyu'uni ja israelit jaa'y ja ttejti, jøts ja griegit jaa'y ñømidi ku ja kyawej'ajtin kyakaj'ajtin. ²⁴ Ots ja jade'en yjawa'andi, tøts ja Dios twi'ixy ja israelit jaa'y jøts ja griegit jaa'y pøn ja amuum tyamay'ajtpy ja møk'ajtin ja wiyj'ajtin Cristo køjxp. ²⁵ Midi ja jaa'y yjanch'uktejtíp Dios ja kyawejin kyakajin, ja' idø'øn ne'egi kamaabyim piðsømp; midits tyejtíp kajotmøk'ajtin ja'ats kidi mibaat pøn myayiyi, yjaaktyimyjinajxpy ja jawaani øy wine'en ixpikyjaa'y yjanamyukyidi. ²⁶ Migu'uktøjkti, ejxti nijawidi ku Dios tø mwí'ijxyidi, o meets jam waani pøn janch'ixpiktyi sam idø'øn ya naxwiiñ yiktsøky, jøts nayide'en niwaani pøn yikmøjpiktaktíp, uk jam tigati yikta'ejxkapti yjønjotp tyøjkjotp. ²⁷ Tigach ja Dios wyinmøaq'ñ, tum ja' ja tø twi'ixy pøn kajotmøjkti jits ja tsø'ødyumbim jyattit pøn jotmøk nayja'widip ya. ²⁸ Ja' ja Dios tø twi'ixy pøn ya naxwiiñ niti kayiktamøjpiktaktíp jøts jade'en tyikugøxit pøn jaty møjpiktaqajkidi ja jaa'y ya naxwiiñ, ²⁹ jøts niti nippøn kyanadyamikaxiyit Dios Teety wyinguijkp. ³⁰ Ja Dios Teety idø'øn kø'øm tø ja Jesucristo mdukpaadyidi jøts muki møøt m'ettit; jits nay ja' tø ttuñ jøts adøm ja Cristo ndawejint ndakajint, jøts nay Cristo køjxpts ja Dios Teety xkupiñkyindi jøts ja amumjoojt xukmøøt'ijtyindi, jøts ja nitsoojkin xmø'øyint. ³¹ Jabi yide'enxi ja Dios kyajpxy wyaq'añ: "Pøni pøn nay'agajpxwajnip wan ja nwindsøn'ajtim tnadya'agajpxyiyyi."

2

Ja Cristo kyajpxy y'ayuujk pøn tø y'øøky

kruskøjxp

¹ Migu'uktøjkti, ku mee nninijkxy jøts ja Dios kyajpxy ndukmadoojojidi, ka'ap øts ja'abi ayuujk nyiktuuñ midi kanimadooni. ² Tu'ugyi øts øts ja ixpøjkìn nbikta'aky ku øts ja Jesucristo ja'ayi nnijawì, jøts jade'en øts ja nnigajpxy ku ja kruskøjxp tø y'øoky. ³ Janch yik'ayo'owim ngaxi'iky jøts tsø'øgi øts yjawì xjanchyik'oo'knip ku meets jam nninijkxy; ⁴ kuts mee tø ndamimadya'aky jøts tø nduknijawidi ja Dios kyajpxy y'ayuuujk, ka'ap øts wi'ijxpyi ayuujk uk kanimadooni ayuujk nyiktuñ sa ja møj nija'wibidi. ⁵ Ja Dios Espíritu Santo meets ja tø mduknimadøyidi jøts ja Dios tø mbudøkiyidi, jøts meets idø'øn xmibøkt kidi ja wijy jaa'y y'ayuuujkøjxpip, pø ja Diosxi myøk'ajtingøjxp.

*Dios Espíritu Santo køjxp idø'øn ja Dios Teety
ñankñijawiyi*

⁶ Tiy idø'øn, janch møj nija'wibim øø ngajpxy ku øøts ja jaa'y nmigajpxy pøn jaty jawaani tø tnija'wiñi ja nwindsøn'ajtim y'ana'amìn. Kidi meets jade'en xja'gyuki ku øøts ja ya'at kajin nyiktuñ sam møj yikutujkpi ya næxwiñ ttundi, midi tsojk kudigøøñidip. Jabi Diosxi øøts idø'øn kø'øm jade'en xyikajpxp. ⁷ Ja Dios wyejin ja kyanin øøts n'ayuuujk'ajtpy midi yu'uch yik'ijtpñim, jøts ja' øøts idø'øn nnigajpxpy ja nitsoojkin midi xemikøjxp ejtp, midi ja Dios yu'uch tø tyik'ity ku wyinaty niti tkayikøjñim. ⁸ Ni tu'ugin ja møj yikutujkpi yø tø tkanimadøy; ka'ap ja nwindsøn'ajtim Jesucristo ja jeexyip tø tyikruspatti kuk ja tja'gyukidyøø. ⁹ Jade'ents idø'øn ja tø yjattì sa jap nøkyijxpy jaabyetyi:

Nipønim ja tka'ixy, nipønim ja tkamadøy, jøts
nipønim ja tkawinmay
pøni ti ja Dios tø ttanibiktaagi
jøts ja tmo'ot pøn jaty ja chøjkpy.

¹⁰ Adømts idø'øn ja tø xuknija'wa'am pøni ti
dø'øn ja tyijpy ku ja Dios Espíritu Santo tø
xuknija'wa'am, jaa kuxi ja tnija'wiguixy tuki'iyi,
jøts njaja'wiyip ja Dios Teety ja wyinmæa'ñ
nayide'en pøni sa jaty ja wyinmay.

¹¹ ¿Pøn idø'øn ja t'uknija'wip pøni ti jam
y'äm yjotp tu'uk jadu'uk ja ja'a'y myøøt'ajtpy?
Jabi wyinmæa'ñxi ja kø'øm ejxiyip midi ja
ñikøjxp'ajtpy. Ja Dios Espíritu Santo nayide'en
nadyu'uk tnija'wimyip pøni ti jaty ja Dios
Teety wyinmæa'ñ'ajtpy. ¹² Kidi ja næxwii'ñit
winmæa'yints adøm tø nyikmø'øyim øø ja Diosxi
adøm ja y'Espíritu Santo tø nyikmø'øyim jøts ja
xukja'gyuka'am ja Dios myøjmay'ajtin ja Dios
myøjkunuu'kxin. ¹³ Ja Dios Espíritu Santots øø tø
xukyikujujy pøni ti jaty øø nnimadyajkpy, ka'ap
øøts ja ngø'øm ixpiky'ajtin nyiktuñ, paty øøts
ja Dios tyiy'ajtin ndukmadøy ja ja'a'y pøn ja'abi
ayuujk ja'abi winmæa'ñ tnimadoojip.

¹⁴ Pøni pøn ja Dios tyiy'ajtin tkanimadoojip,
ka'ap ja tkupøkti pøni ti ja Dios Espíritu Santo
yjanigajpxpy, nugo ja tijy kawej'ajtin. Ka'ap
tnimadøy, kumi ka'ap ja tnijawi sudso ja tja'gyukit,
ja' kuxi ja Dios y'Espíritu Santo tkamøøt'ajtidi.

¹⁵ Pønts ja Dios Espíritu Santo myøøt'ajtpy øy ja
tigati tja'gyukit jøts nipøn ja sa kyanø'ømxit. ¹⁶ Øø
nømpxi ja kajpxy jap nøkyijxpy: “¿Pøn idø'øn tø
t'uknimadøy ja Dios wyinmæa'ñ? Nipøn kyamayi

jøts ja Dios tkajpxwejt.” Øy ja yjade'en'aty, ja Cristo adøm ja wyinmaq'ñ nmøøt'ajtyimp.

3

Tu'ugyi øøts ja ndunk ku øøts ja Dios nmidiuñ

¹ Kuts mee migu'uk ja Cristo y'ayuujk tø nduk-madowdi, ka' meets jade'en nmigajpxy sám idí'in yikmigajpxti pøn ja Dios Espíritu Santo yja' tø ñadyami'yoxkøjxniyidi, jade'en mee tø nmigajpxy sám ja jaq'y pøn tkajanchja'widiipním, jøts sám yiktukmadowdi ja mutsk una'jk, ja Cristo yja'. ² Tum ja' mee tø ndukyikuyuji midi jaqtñi, jade'en mee tø nduñ sami maxu'nk ja'ayi tsejtsk nøø yikmø'øy jøts ka'ap kaaky tojkx; ja'agøjxp ku mee mgamayinim midi tsep sám ja maxu'nk ttagupøkti ja tø'øts kaaky ja tø'øts jiil'kxy; nayide'ents meets ixyam ook tigøy m'ity, ka'aním mee mmayi ja tseppi, ³ ja'agøjxp ku nayide'en x'ejxtinim sám ja jaq'y pøn ja Dios y'ayuujk tkanija'widiipním, ku mee mnadyami'ekyi tigati; ku mnamyijotma'adyidi jøts mga'uknamyigajpxwa'aniyidi jøts nayide'en mga'uknawyin'ejxwa'aniyidi, nayide'en mee xuni sami nugo jaq'y pøn ja nwindsøn'ajtim Jesucristo tkanija'widiipním. ⁴ Pø kuxi mee mnimy: “Øtsi Pablo møøt”, jøts jadu'uk ñømi: “Øtsi Apolos møøt”, nayide'en mee m'adi'ich sám idø'øn ja jaq'y pøn ni tu'uk ja Dios kyajpxy tkanija'wip.

⁵ ¿Tyimbyøn ja Pablo? jits ¿Tyimbyøn ja Apolos? Pø ja Diosxi øøts ja'ayi xumbi'ajtp, nay ja'ats øø tø xyiktunkpaaty jøts meets yja' ja tø xmibøjki. Ja ndunk øø tø nduñ midi øøts ja Dios tø xaguwaní. ⁶ Jade'en ja tpaaaty, øts idø'øn ndejint tø nni'ipy ja

tømt, jøts ja Apolos ja tø tnøguway jøts tø t'ejx'ity. Jøts ja Dios, ja'ayits tø tyikmuxy tø tyikyøñ ja tømt. ⁷ Ja Dios idø'øn tu'ugyi møy, jøts ja' idø'øn tuki'iyyi tungøjxp, pø ja'axi ja tømt tø tyiktsø'øky jøts niti ja'adi pøn ja tø tjani'ipy uk pøn ja tø tjanøguway. ⁸ Nipønts kyamøji kyamutski øy ja tø yjani'ipy uk øyts ja tø yjanøway, pø ja Diosxi kø'øm ttanipatp ja mijuu'ñ pøni sa ja tyunk ja yø tyikyø'øy naxwiiñ. ⁹ Tum tumbi ja'a'y øøts idø'øn namajtsk. Ja Dios øøts idø'øn xumbi'ajtp, jøts meets idø'øn mgam'ajtp midi ja Dios yja'ajtpy.

Uk nayide'ents n'ukpiktaajkint, meets idø'øn mdøjk'ajtp midi ja Dios kyøjpy. ¹⁰ Øts idø'øn ja Dios tø xpikta'aky pojtspi ana'ambi, jøts øts idø'øn ja tøjk tø nbots'okwa'añ, jøts ja wenkpi pojtspi tjaaktyikyø'øy ja tunk. Tum a'ejxits ja tsøky sa pønjabøn pyøch. ¹¹ Nipønxì kyapaat'atyiyi jøts ja pøch ja abiky tyiktso'onda'akt, pø tøxi ja tu'ugyi tyaañ midi ja Jesucristo pyøchkojpk'ajtpy. ¹² Kuts ja tøjk jyaakjayikpøch, ots ja oori yjaakpat, uk ja platis, uk tum tsuj tsaa, uk øyts nayide'en ja pu'uy, uk ja miyyts, uk øyts ja wøxkipy, ¹³ ku wyinaty ja tiidyu'unin tyaaaty jamnimts nøigaxø'økt pøni sa pøngapøn tø tyuñ; pø tum jøønxì jam wyinaty tump, ja'ats tyiknigaxø'økp pøni ti ja tøjk tø yiktakøjy. ¹⁴ Pøni pøn wyinaty tø tyiktuñ midi ja jøøn kamayip, yikmo'opts ja' myijuu'ñ; ¹⁵ kuts ja wyinaty tyøy, windigø'øpys ja tuki'iyyi midi ja wyinaty tø tjaøch øy wyinaty awisa yjanch'awa'atspidsimy pøn idø'øn jade'en tø pyøch.

¹⁶ ¿Ka' mee xnijawí ku meets ja Dios Teety mdsaptøjk'atyidi jøts ku ja Dios Espíritu Santo jam

chøøni? ¹⁷ Pøni pønts tjejtip ja Dios ja chaptøjk, yikudigøyip ja Dios ja', ja'agøjxp ku kyunuukxyi Dios chaptøjk, meets ja Dios mdsaptøjk'ajttip.

¹⁸ Kidi kø'om mnadyuñidi. Pøni jam tu'ugin i xpiky jaa'y ñayjawiñi, wan nayeide'en nabyikta'agiñi ejxim ja jaa'y midi niti tkajajtp, jøts jade'en tpaaatt ja wejin ja kajin midi kanaxp.

¹⁹ Pø janch jawaani kajaaxi ja Dios wyejin jøts nika' jade'en ja jaa'y y'i xpiky'ajtin. Yide'enxi ja Dios kyajpxy wya'añ: "Ja kyø'om i xpiky'ajtin ja jaa'y tabakjo'opidip ja Dios, jøts ja kø'om tyuktagidawiyidit." ²⁰ Nayide'ents wyami:

"Ñija'wip ja Dios ja' ku nimä kyatuñ ja i xpiky jaa'y wyinmaa'ñ." ²¹ Paty meets mganadya'agajpxiyidit ni:pøn; pø meetsxi mja'ajtpy jøts ø xyiktunkpaattit tuki'iyi: ²² ixa Pablo, Apolos, Pedro, et naxwiiñit, jujky'ajtin, o'jkin, ixyam'ajtin, jøts midi memp midi ja'tp; ²³ ja Cristots mee mja'ajtidip, jøts ja Dios Teety ja Cristo tja'atmi.

4

Ja nwindsøn'ajtim kyudanaabyi tyunkjøjp

¹ Paty meets jade'en xja'gyukit jøts ku øts ja'ayi ja Cristo nbudøki, ja'ats ø ndunk'ajtpy jøts ø nnigajpxt ja Dios y'ayu'uch winmäa'ñ. ² Pøni pøn ti tø yiktaguwani, yiknigaxø'økp idø'øn ja' ku ja tpadu'unt. ³ Ka' øts ja nmøjpikta'aky pøni sa meets xnigajpxy xnimadya'aky, uk pøni sats øts ja xejti xwa'andi pøn jaty ya naxwiiñ ja jaa'y tiidyundip. Ni øts paat nganadyunk'atyi kø'om pøni sa ø njaa'y'aty. ⁴ Nitits nganadyapøkyjawiñi, nnija'wip øts wa'ats ku øts ka' axøøk njaa'y'aty,

ka'ats ja njøp'ejxin ku øts ja nbøky kya'ity, ja nwindsøn'ajtimts ø kø'øm xiidyu'ump. ⁵ Paty kidi x'øyja'widi xka'øyja'widi ixyam tigati; awejxtinim wan ja nwindsøn'ajtim tyiknigaxø'kixy pøni ti jaty kayik'ejxpøtp, jøts nay ja Dios tyiknigaxø'økp pøni sa' t'ixy tu'uk tu'uk ja anmija'win, jats ja Dios ja t'øyja'wit uk tka'øyja'wit.

⁶ Migu'uktøjkti, meets m'øy'ajtingøjxp øts jade'en nwa'añ jøts xni'ejxu'uttit ja Apolos uk xni'ejxu'uttit øts. Paty øts idø'øn jade'en nwa'añ jøts nayide'en mjaa'y'attit sam øøts. Ka' nugo xu'undit agubajkpy yam ja Dios kyajpxy jade'en kyawa'añ jøts kidi nugo pøn xnadyamikexyidi uk xmi'ambøjkmidi pøn. ⁷ ¿Uk jaa dø'øn tu'uk ja'a'y pøn jawaani myikwejidip? ¿Ti kø'øm tø xpøatti midi ja Dios tø mga'ukmø'øyidi? Pøni tum ja Diosts tø mmø'øyi, jadits ku mnadyamikexyi pøni ti jaty mmøøt'ajtpy, jade'enxi me mwani ku mets ja kø'øm tø xpøaqy pøni ti jam mmøøt'ajtpy.

⁸ Kumeeñ ja'a'yin meets yjawí mnayjawiyi pøn niti tka'ukta'ayoonidip. Windsønin yjawí mnayjawiyidi, jøts øø xka'ukja'myatsni. ¡Ogidø'øn tyimyjanch mjanchwindsøn'atti jeexyip, jøts øø nayide'en ja ngutujk xmo'ot! ⁹ Jade'enxi øts yjawí nja'gyuki, pø tø øøts idø'øn ja Dios tyimy'ixoojk xyiktañ; jøts øøts idø'øn yjawí tø nyiktanibiktaqagi jøts øø n'oookt; jøts øøts jade'en ja tsajp ja naajx x'ext xjawit, nayide'en ja Dios y'ankilis mørøt ja naxwii'ñit ja'a'y. ¹⁰ Maap mo'tp øø nyiktijy ku øøts ja Cristo yja' nbaduujni yam mee mnadyijiyi møj nija'wibi pøn tnimadoogøjxidip ja Cristo yja'. Ka'ap øø njotmøjki yam meets yikxon myikwindsø'øgi. ¹¹ Ixyambøat øøts yuu ndani'iixy

møöt tøødsi, jøts ka'ap øøts nwet nnqam̄y te; øy øøts ja'a'y sagasā xuñ, ka'ap øøts ndøjk te mā ø nboo'kxt, ¹² jøts nmijotkijxpy øøts ndunk nbøjk. Xjamigajpxigøøpy øøts ja'a'y, ja øy tsuj ayuujk øøts ja nda'adsojimbijtpy. Ngupijkpy øøts pøni xpawojp øøts ja'a'y. ¹³ Xjanchjabagajpxp øøts ja'a'y, tuda'akts øøts ja n'an'eemy. Pista'agin øø nyiktuñ uk jade'ents øø nyikjawi ejxim ja'a'dyi'iñ ja'a'dya'ach.

¹⁴ Ka' mee nnijayi jøts xatsø'ødyu'undit ku jade'en mdsøønidì, n'ana'amwampy meets idø'øn ja'agøjxp ku mee n'u'nk n'unaq'jkin njawi pøn ø ndsojktip. ¹⁵ O meets jeexyip xjamøøt'aty namay ja yik'ixpøjkpi, ka' meets jadine'en ñamayi mdeety jabi øtsyixi meets ja'ayi tu'umpchi xeety'atp ja'agøjxp ku ja Cristo ñitsoojkin tø ndukmadowdi jøts ja janchja'win tø xpaattì. ¹⁶ Ixyam̄ts mee n'amidøy jøts ø xpa'ejxit.

¹⁷ Paty meets ixyam̄ ndaniguexy ja Timoteo pøn ø n'u'nkja'wiñ nwindsøn'ajtimgøjxp, jøts pøn ø nayide'en xkamajtstutp. Yø' mdrukja'myatsidip sudso ø ndsøøni kuts ja Cristo nmibøjkì ja yja'sā o magamā ndukiykyujti pøn jaty ja Cristo tjanchja'widip. ¹⁸ Jam meets ja mmigu'uk pøn janchnamyikajxniyidip, nømp ja wyaq'andi kuk mee nga'ats'ext ja'agøjxp ku øts ja' ndsø'øgidi. ¹⁹ Pøni yikutujkpyts ja Dios, nninøjkxtipts pojìn. Jamnimts ø n'uk'ext pøni janchtundip idø'øn pøn namyikajxidip uk nugo dø'øn kyajpxti. ²⁰ Ka'axi dø'øn nugo nmadyajkint ku ja Dios yja' nbaduujñindi, pø jatyixi dø'øn ja yikpadungoxt. ²¹ ¿Sudsots uk mdsojktip jøts øts awaq'an nnøjkxt jøts

n'atskastigimo'odit, uk ja yuwy'ajtin jøts ja tsojkin
ø nm̄inøjkxp ku wyinaty n'ats'ejxti?

5

*Ja' yiknigajpxp ku ja kya'øyi ku pøngapøn
ñamyøøt'atyidi nugo*

¹ Jade'en ja kajpxy yø'øy, jamik ja mmigu'uk tu'uk ja kyudaq̄ak tmøøt'aty. Janch møj ka'øy ja a'yajtin idø'øn jade'emb̄ tsinaaq̄'yin, ni jambaat yø kyayikupiky ma ja ja'a'y ja Dios tkanijäwidi.

² ¿Jøts niti meets idø'øn xkidyimbyøkyjawí ku ja mmigu'uk jade'en y'adil'ich? ¡Meetspik idø'øn jeexyip mjotmay'oo'ktøjkip ku mmigu'uk jade'en y'adil'ich! Pøn yaq̄'dyøjk idø'øn jade'en tø y'adil'ich ka'ap ja y'ukpaat'ajtniyi jøts ja jam xmøøtsøønidit, pawøpy ja pyaq̄at'atyi. ³ O meets idø'øn njagamøøtsøøni jamts øts ja nwiniñmaaq̄'ñ nyik'ity; tøts ja ndiidyuni winmaaq̄'ñjotp pøn jade'en tø y'adil'ich ejximdam øts jam jeexyip ndyimchøøni. ⁴ Namyukidi nwindsøn'ajtimgøjxp, jam ø wyinaty ja nwiniñmaaq̄'ñ meets møøt, jøts ja nwindsøn'ajtim Jesucristo myøk'ajtin mbudøkiyidit. ⁵ Jøts xyikjìwa'aktit ja ja'a'y, wan ya ja miku' yik'ayo'ombaädyiyi kunim ja nwindsøn'ajtim Jesucristo wyinaty myiñ tiidyumbi, janimts ja nøjkx yiknitso'ok'ajtxiyi ja y'anmija'win.

⁶ Paty kidi mnadyamikexyidi pøni ti jaty jam mdundip. ¿Ja ka' mee xnijäwi ku ja ka'ødyumbi ja yja' nugo tyikmiweni? ⁷ Paty kidi xmaa'kxti ja ka'ødyumbi midi tø wyindigøøni, midi jam nugo myikmaq̄'jtidip. Jøts øy wa'ats m'ettit. Pø

tøxi kø'øm ja Cristo xku'o'ka'am kruskøjxp, jøts ja tø wyindsø'jkin'aty adømgøjxp Dios Teety wyingujkp. ⁸ Ja tiy'ajtin ja øy'ajtin adøm idø'øn ja Dios ndawindsø'jkiy'ejtimp, jøts ka'ap nijuuni nyikmøj'ajtint ja y'axøøkpi midi ja anmija'win nugu tyikwindigøøpy.

⁹ Nnimaay meets ku ja nøky ojts tu'uk ndanigaxti, jøts xkamøøtsøønidit pøn jaty ja y'axøøkpi yigaappi pyawinmaadyip jøts tum ja' tyunk'ajttip. ¹⁰ Ka'ap meets idø'øn ja yide'en xja'gyukit jøts ku meets abiky mdyimñabyiktaajkmiyidit, jøts ja ka'øy jaa'y, jøts ja meengyax jaa'y, jøts ja maa'tspi jaa'y, uk jøts ja tsamaxan windsø'jkip jaa'y xkadyimy'ukwin'ejxnidit; jabi kuwañimxi ja ya x'ejxit ja'abi jaa'y o mædsoo. ¹¹ Yide'en øts idø'øn ja ndiyj jøts ku meets mganamyukit mørøt ja' pøn nañikajpxiyip Cristo padumbi, yam ja kya'øyja'a'y, uk myeengyaxi, uk tsamaxan windsø'jkibi, uk yja'aji pøn tuki'i'y i tkajpxyø'øgyojp, uk pøn ja nøø ja mu'uk ttunk'ajtp, uk myeech. Ja jade'emb i jaa'dyi ni xkamøøtka'aty meets idø'øn ja'. ¹²⁻¹³ Ka'ap ø xpaaat'aty jøts ø ndiidyu'unt ja wenk jaa'y midi abiktyi, ja Dios ja paat'ajtiyip. Meetsts idø'øn mbaat'ajtidip jøts xiiidyu'undit ja mmigu'uk. Paty xyikjiwaa'aktit ja poktyumbi midi jam mørøt tsinaadyip.

6

*Ku ja kajanchja'wibi juez ja janchja'wibi jaa'y
tmi'øøndi*

¹ Ku meets mmigu'uk xni'øøniwyø'qañ, çtigøjxp meets idø'øn ja xaninijkxy ja juez pøn

tkajanchja'wip ja nwindsøn'ajtim Jesucristo, jøts nika' ja xaninøjkxti pøn ja janchja'win nayide'en tmøøt'ajttip? ² ¿Uk ka' meets idø'øn xnijawí ku ja' ttiiðyu'undit ja naxwii'ñit jaa'y pøn ja Dios yja' tpaduujnidip? Pøni meetsts mdiidypywyinaty ja naxwii'ñit jaa'y, ¿ka'ats meets idø'øn xjaty sudso xu'undit jøts xiðyu'undit pøni ti jam tuujnip jajtip? ³ ¿Ka' xnijawidi ku ja ąnkilis paat ndiidyu'unindit? ¡Pøni jade'ents ja wyinaty, nija'wa'ampts adøm idø'øn sudso ya'ndiidyu'unindit naxwiiñ! ⁴ ¿Sudso dø'øn ja xaninøjkxti ja wenk jaa'y pøni ti dø'øn ya' naxwiiñ mdsep'ajttip m'ayo'on'ajttip? Ja' meets ja mdaninijkxpy pøn kajanchja'widip. ⁵ Ya'atpi dø'øn ti mjanchtatsø'ødyu'undip. ¿Ni tu'ugin meets ja jam xkamøøt'aty pøn tjajtp ja tiðyu'unin? ⁶ ¿Tsaach'øy idø'øn ja' jøts namajtsk ja janchja'wibi ñañi'øøniyidi ma' ja jaa'y jam kyajanchjawidi?

⁷ Tsø'ødyumbimxi mee mjagaxø'kní ku meets jam tukjanchja'wibi jaa'y mnamyidsep'atyidi. Ku ne'egi amøñi xkamidanidi pøni sa myiktundi. Nisa ne'egi mgawa'andit øy mjayikwimaa'tsti. ⁸ Janch tum wiimbet'ampy mee ne'egi xuñ, øy meets ja mgø'øm mmigu'uk sa xuñ midi jagati pøky, uk wime'chpts meets ja' ne'egi.

9-10 ¿Uk ka' idø'øn xnijawidi ku ja Dios ja kyutujk wyinaty tkadanitani pøn jaty ja tiy'ajtin tkatundip? Nay'ejx'etidi, ejxim myikwin'øøndi, ka'axi wyinaty ja Dios ttanitani ja kyutujk pøn jaty namyøøt'ajtidip øy ja jyaga'amajtskidinim, ni ja' pøn jaty ja maxandsaq windsø'jkidip, ni ja' pøn jaty ja wenk to'oxyøjk uk wenk yaa'dyøjk tmøøt'ajttip, ni ja yaa'dyøjkti pøn ja myiyaa'dyøjk tmøøt'ajttip,

ni ja' pøn jaty maa'tstip, ni ja meengyäxti, ni ja' pøn tuki'iyi tjanchkajpxyø'øgyøxtip jatyi, uk pøn jaty ja wín'øø'nk ttunk'ajttip. ¹¹ Jam mee muumä pøn jade'en y'ijty tsinaadyip; ka'ats ja ixyäm jade'en y'uktsinaañidi pø tøxi ja nwindsøn'ajtim Jesucristo køjxp pyøkwyåtsnidì, jøts ja Dios Teety tø yiktagidøkidi, jøts y'Espíritu Santo køjxp ja tø xkupijkyindi.

Sudso ja nne'kx ndawindsø'jka'ant ja Dios

¹² Jade'en ja ayuujk yø'øy ku o tigati nduu'nint, nípøn ja xkadabayø'øyint. Øy idø'øn ja jade'en yjawä'añ ka'ats tuki'iyi y'øduñ pøni ti yiktump; jabi ka'axi pyaat'atyiyi jøts ja tu'ugyi nugo ndyimyikmajadäjkìn. ¹³ Janch idø'øn ku ja kaaky ja tojkx ya tø yikpikta'aky jøts ja maatsjotp ñøjkxt, ka'ats ja ne'kx ja' wyä'añ jøts ja nugo yiktapøkyu'unt sam ja winaagin ja'ayi ttunk'attì. Kudigøøpy y'ity ja kaaky ja tojkx jøts ja maats nayide'en, ne'egi tampts xemikojxp ku adøm nne'kx ja Dios Teety ndawinja'wa'ant ndawindsø'jka'ant jøts ja nayide'en amuum xmøøt'ejtint. ¹⁴ Nayi myøk'ajtin ja yik'awä'amp jøts ja xyikjujkpyøjkìn jadigojk sam ja nwindsøn'ajtim Jesucristo ja ojts tylikjujkpyiky.

¹⁵ ¿Ka' mee xnijawi ku meets yø mne'kx Cristo tne'kx'aty nayide'en? ¿Øy idø'øn jøts ja Cristo ñe'kx nnixajiyit jøts øts ja nmo'ot ja ka'ødyø'øxyøjk midi ttunk'ajttip ja yaa'dyøjk? ¡Nimä yø jade'en kyatiy! ¹⁶ ¿Uk ka'aním idø'øn xnijawidi ku ja ka'ødyø'øxyøjk yikmøøt'aty jøts tu'ugyi ja ne'kx namyayı wyimbejtni? Pø nømpxi ja nøky wyä'añ:

“Tu'ugyi ja nøjkx wyimbetti.” ¹⁷ Kuts tu'uk ja ja'a'y ja nwindsøn'ajtim Jesucristo tminamyayi, tu'ugyits ja nayide'en wyimbejtnidi.

¹⁸ Paty kidi nugo mnamyøøt'atyidi, wingaktu'utti yø'øbi øky. Øy idø'øn øky yjaji, yiktump øy midi'ibi jadu'uk øky, ka'ats ja jade'en tyimbyaqat sám ja jade'embí øky, pø ja kø'øm ne'kxi øktyumbajt tyimwyamp kø'ømts ñamyayi ja namyidundigøyi. ¹⁹ ¿Ka' xnijawidi ku meets ja Dios Espíritu Santo mdsaptøjk'atyidi? ¿Jøts ku ja Dios Espíritu Santo jam chøoni mne'kxkøjxp? Pø ni yø mne'kxi mee xkaza'aty, ²⁰ pø janch tsowixi ja Dios tø mjuyidi ku ja y'u'nk tø xku'ayo'ombaajta'am. Paty meets idø'øn ja Dios ja mne'kx jøts ja m'anmija'win amuum xawindsø'øgit, jabi tum Diosxi yø' yja'.

7

Sudso ja amajtsk jaa'y'ajtin ñaxt

¹ Ixyam øts ja nøky n'adsojimbijty midi mee tø xaniguexy. Ja øy ja' ku jaa'y kya'amajtskidit;

² jade'ents ne'egi pyaat'atyi jøts ja yaa'dyøjk kija' tmøøt'attit ja ñidø'øxy, jøts ja tø'øxyøjk kija' nayide'en tmøøt'attit ja ñiyaa'y, ja'agøjxp ku ja pyøkyi ku jaa'y nugo ñamyøøt'atyidi.

³ Myimado'op idø'øn ja yaa'dyøjk ja ñidø'øxy nayide'en sám ja tø'øxyøjk tmimadoomit ja ñiyaa'y, jøts jade'en nixem niyam ñadyajotkujk'atiyidit.

⁴ Ka'ap ja tø'øxyøjk nadyu'uk tja'aty ja ñe'kx, ja ñiyaa'y ja paat'ajtiyip; jøts nayide'enmi ja yaa'dyøjk, ka'ap ja nadyu'uk tja'aty ja ñe'kx, ja ñidø'øxy ja paat'ajtmiyip. ⁵ Nagyupøkidip

idø'øn ja namajtsk jøts ñamyøøt'atidit; pøni tyundipts ja kajpxy jøts ñay'amaqay'atidit ku ja Dios wyinaty t'ajot'atwø'andi, ots ja jade'en ttu'undit. Kuts ja jotmay tyikugøxidit, nayide'ents ja chinqaq'yin tyikyø'øgyojmidit, ja' ka'uk'øyni ku kya'uknagyupøjkniyidi jøts ja miku' winøømbi tyuktunidit ja pøky abiky.

6 Ka' mee ndaguwaní jøts mga'amajtskidit, amajtski meets pøni jade'en xtsojkti. **7** Jade'en ø njatsøjky jøts mee mga'amajtskit sam øts; ka'ats adøm ja Dios ja winmøq'ñ jøts ja kunuu'kxin tum jade'en tø xmø'øyim, tigach ja tø tyikwa'kxy.

8 Pøn jaty ka'amajtskidipním, uk pøn tø kyu'o'kiñidi, ja' øts idø'øn n'ana'amdip ku yjawí yja'øyi jøts kya'amajtskidit sam øts. **9** Pøni ka'ats tmimajada'akti jade'embí tsinqaq'yin, wan ne'egi t'amajtskidí pø ka'axi y'uk'øyini ku ja wyinaty o pøngapøn t'ukmøøt'ajtni.

10 Pøn jaty amajtsk jaqa'y, ja'ats ø n'ana'amdip jøts ja tø'øxyøjk niujuuni xøøw tkamajstu'utt ja ñiyaqa'y. Kidi øtsip idø'øn jade'en wamp, ja nwindsøn'ajtim idø'øn jade'en kø'øm ana'amp. **11** Pøni myajtstutpyts ja tø'øxyøjk ja ñiyaqa'y, ka'ap ja y'amajtskit, uk myøøtnagyajpxipts ja ñiyaqa'y jøts jadigojk y'amatskja'a'y'attit. Nayide'ents idø'øn ja yaqa'dyøjk pyaat'atyiyi ttu'unt.

12 Yide'ents ø nwåmi, øy ja nwindsøn'ajtim jade'en yjagawa'añ, pøni pøn yaqa'dyøjk tø tmøøt'amatski tu'uk ja tø'øxyøjk pøn ja janchja'win tkamøøt'ajtp yam ja yaqa'y ne'egi ja janchja'win tmøøt'aty, pøni tøts ja kajpxy ja ttundi jøts ja y'amajtsk'ettit, ka'ats ja yaqa'dyøjk ja tmajtstu'utt.

13 Pøni jamts ja tø'øxyøjk tniyaa'y'aty tu'uk ja yaaq'dyøjk pøn ja janchja'win tkamøøt'ajtp yam ja tø'øxy ne'egi ja janchja'win tmøøt'aty, pøni tøts ja kajpxy ja ttundi jøts ja y'amajtsk'ettit, ka'ats ja tø'øxyøjk ja tmajstu'utt. **14** Pø tøxi ja yaaq'dyøjk kunuu'kxy tyañ øy ja janchja'win ja tjagamøøt'aty ku ja tø tpiky tu'uk ja tø'øxyøjk pøn ja janchja'win tmøøt'ajtp. Jøts nayide'en kunuu'kxy tø tyañ ja tø'øxyøjk øy ja janchja'win ja tjagamøøt'aty, ku ja tø tpiky tu'uk ja yaaq'dyøjk pøn ja janchja'win tmøøt'ajtp. Ku ja kyajade'enit, tum kajanchja'wip u'nkts meets ja m'u'nk m'unaq'jk wyimbidsømni; ka'ats, pø tøxi Dios ja y'øyjaaq'y'ijxyidi Jesucristo køjxp. **15** Pøni y'amidøøpyts nídu'ugin ja yaaq'dyøjk uk ja tø'øxyøjk pøn dø'øn ja janchja'win tkamøøt'ajttip jøts ñawya'kxiđit, wants tnawya'kxyidi. Niti ayuujkts tka'ukmidanidit ja yaaq'dyøjk uk ja tø'øxyøjk pøn dø'øn ja Dios tjanchja'wip, pø ja'axi ja Dios xamidsojkimp jøts ka' ja tsep uk ja ayo'on nmidsinäa'yindit. **16** ¿Ja ti me tø'øxyøjk mdanija'wip pøni myiknitso'okp mets ja mníyaaq'y ku ja janchja'win ja tkamøøt'aty? uk ¿ti me yaaq'dyøjk mdanija'wip pøni myiknitso'okp mets ja mnidø'øxy ku ja janchja'win ja tkamøøt'aty?

17 Ots jyasä'ji, tum jade'en idø'øn ndsinäa'yint sa ja nwindsøn'ajtím ttsøky, jøts pøni sa adøm ja jujky'ajtin ja tø xmø'øyim nay jade'en sam wyinaty njujky'ajtyim ku ja Dios ojts xwaadsø'øyindi. Jade'en øts idø'øn n'an'e'empy ma jaty ja janchja'wibitøjkti. **18** Pøni wyaadsøøpy ja Dios ja jaaq'y pøn ja ejxpajt ñe'kxkjxpy myøøt'ajttip sam ja israelit kostumbri, ka'ap ja ttatsø'ødyu'unt,

wan ja jade'en ttañ; pøni wyaqadsøøpyts pøn ja ejxpajt ñe'kxkijxpy tkamøøt'ajtp, ka'ap ja kuwanikøxp yikpiktaajkit ja ejxpajt ñe'kxkijxpy.

19 Wan ja tmøøt'aty uk tkamøøt'aty ja ejxpajt jap ñe'kxkijxpy nugo ku ja Dios ja tpaduujni ja kyutujk. **20** Jade'en idø'øn ja'a'y tyaq'ant sám ja y'ijty t'ixy ku ja Dios y'ejxkjapiyi. **21** Pøni nugots øy pøn windsøn mdyimyiktuñiyi sám ja'a'y jiyujk tsakaa tjagyepy winet ku ja Dios ojts mwqadsøyi, ka'ats mets ja xkumayjawit ku wine'enin xpaatt ja awa'ats'ajtin. Jatyits idø'øn ja xkupøkt, ka'ap ja jeky xpawinma'aty.

22 Pøn idø'øn wyinaty juy ja ja'a'y yik'ejttip ku ja yiktamidsøky jøts ja nwindsøn'ajtim ja tjanchjawit, ja nwindsøn'ajtimts ja ixyam myidunip kø'ømdsøky, ka' juy, jøts ja ja'a'y pøn jaty jade'en tkayiknajxtip nayide'en ja ixyam ja nwindsøn'ajtim kø'ømdsøky tmidunidi, ja Cristo ja' tyumbidi. **23** Janch tsowi meets ja Dios Teety ja y'U'nk mdagujuyi, paty kidi nugo mnay'ixmachidi jøts ja ka'øchinaq'a'yin xpadøjkiñidit. **24** Jade'ents migu'uktøjkti, jøts jade'eña'am xyikyø'ødyit ja mjujky'ajtin sám ja Dios tø mbaqadyidi ku tø mwqadsøyidi.

25 Tits ø nda'ana'amdiøp pøn ka'amajtsk ja'a'dyi, ka' ja nwindsøn'ajtim ja sa tnigajpxy; øts idø'øn ixyam ngajpxnaxwampy tu'uk ja nwiniñ sudsø dø'øn yjawi tyuu'bøatt tyuu'wetst ja tsinäa'yin. **26** Jade'en ø njawa'añ jøts ja ya'a'dyøjk jadi'iñi tyaq'ant ja'agøjxp ku ixyam ja tsinäa'yin janch tsep janch aduky. **27** Pøni m'amajtskjaa'yits, kidits x'ixa'ay sudsø ja mnidø'øxy møøt

mnamyajtstu'udit; pøni ka'ats m'amajtskja'a'yì, kidits ja amajtsk'ajtin xpawinmay. ²⁸ Pøni m'amajtskipts ka' me mbøktyuñ; pøni amajtskipts tu'uk kiixe' ka'ats ja nayide'en pyøktyumi. Pøni amajtskidip tsep ja chinqa'yìn ja tpaattit; ja'ats øts idø'øn njatsøjkpy ku øts idø'øn jade'en njawa'añ, jøts ja ayo'on xkapaaattit.

²⁹ Meets migu'uktøjkti, ja'agøjxp øts idø'øn jade'en nwø'añ ku ja nwindsøn'ajtim wyøngoni. Paty ixyam mdsinaañidit yide'en: Pøn jaty ja ñidø'øxy jam, ja Dios idø'øn ja yja' ja ne'egi tyajotmay'o'jkip jøts ja yjujky'ajtin tyiknaxt ejximdam ja jeexyip nadyu'uk'aty. ³⁰ Pønts yaxtip jiidyip, jade'en ja chøønidit sám ja' pøn kayaxtip kajidiyip; pøn jotkujk'ajttip xondaktip, jade'en ja chøønidit sám ja' pøn kajotkujk'ajttip kaxondaktip; pønts juudyip kajpxtip, jade'en ja yjuy kyajpxy ja tjawiñit ejximdam ja jeexyip tkamøøt'atti. ³¹ Pøn jaty ttaxondip yø naxwii'ñit tsinqa'yìn, jade'en ja ñayjøwiyidit sám ja' pøn jaty ja tkadaxondip; jabi kugøxi jøp'amxi yø naxwii'ñit tsinqa'yìn y'ity.

³² Ja' meets idø'øn njadamidsøjkpy jøts ka' øy ti nugo xtyimdyajotigø'ødyit ya naxwiiñ. Ku dø'øn ja yaa'dyøjk kya'amajtskja'a'yì, ja nwindsøn'ajtim ja ja'ayi pyawinmaapy sudso ja tyikjotkujk'att; ³³ kuts ja y'amajtskja'a'yì, ja'ats ja pyawinmaapy sudso ja yjujky'ajtin tpaatt jøts ja ñidø'øxy tyikjotkujk'att. ³⁴ Tigach ja tø'øxyøjk tsinqa'yìn tyiknaxy midi ka'amajtsk jøts nayide'en ja' midi amajtsk. Midi ka' y'amajtsk ja nwindsøn'ajtim yja' ja tyajotigøøjyip jøts ja amuum ttamiyøxy ja

ñe'kx møøt y'anmija'win; pønts jam ja ñiyaa'y, ja' myijotigøøpy jøts sudso ja ñiyaa'y tyikjotkujk'att.

³⁵ Ka'ap øts ya'at nnigajpxy jøts mee niti xkady-imy'uktunk'atnit, paty øts idø'øn yø nnigajpxy jøts yikxon mdsøønidit sám idø'øn yjapaat'atyiyi jøts ja nwindsøn'ajtim yja' xmijotigø'ødyit.

³⁶ Pøni jamts ja u'nkteety pøn t'øyja'wip jøts ku yjawi y'øyi jøts ja ñøøx ne'egi y'amajtskit ja'agøjxp ku ja yjawi ja yjumøjt ñaxni jøts ja wyinmøa'ñ tyigatsni, wants jade'en ttuñ pøni øy tjawi, pø ka'axi ja pyøkyi. ³⁷ Pøni jamts jadu'uk ja u'nkteety pøn idø'øn yikxon tpawinmaapy øy tsuj jøts ja ñøøx ne'egi kya'amajtskit, øyts idø'øn ja y'adil'ich jade'en. ³⁸ Paty idø'øn jade'en pøn ja ñøøx tyik'amajtskip, øy adøtsp idø'øn ja wyinaty; pønts ja ñøøx tkayik'amajtskip, jaaktyimwyindøøpts idø'øn ja wyinaty jawaani ku ja jade'en wyinmay.

³⁹ Kutujkøjxp ja tø'øxyøjk tmøøtsøøni ja ñiyaa'y pøni jujky'ajtp ja'; pøni o'kp kudigøøpys ja', øyts ja pøn tmøøt'amatskiñit, nugo ku nayide'en ja yaa'dyøjk ja janchja'win tmøøt'aty. ⁴⁰ Ne'egi jotkujk ja chøønit pøni ka' y'uk'amajtskiñi. Jade'en øts idø'øn ja ngø'ømgajpxwejin nyaky, jøts nmøøt'ajtpy øts idø'øn ndijy ja Dios Espíritu Santo.

8

Sudso ttu'undit ku ja windsø'jk'ii'ñ yiktanìwa'qdit midi yiktawindsø'jk'ip ja maxandsaa uk øy ti jadu'uk awanax

¹ Ixyamts ø nnigajpxwa'añ sudso xu'undit ja kaaky tojkx midi tø yiktawindsø'øgi ja maxandsaa. Wa'ats ja njanija'wa'andi sa ja

ndu'unindit; ja'ayi ja nugo nnadyamiguejxyindi ku adøm møj ni^{ja'}wibim, ka'ap ja nmøjpiktaajkyin ku ja tsojkin ja pa'ayo'owin tyikmøji tyikmayi ja wiñmqañ. ² Pøni jam ja jaa'y pøn nadya'agajpxip ku ja ti yiin wan tnijawi ja'agøjxp ja jade'en wyä'añ ku ja kyawijyi kyakejyi. ³ Jabi y'ejxkajpyts ja Dios ja' pøn ja tsojkip.

⁴ Sudsots idø'øn xu'undit, ¿mga'adyip mjøø'kxtip idø'øn ja' midi ja maxqandsaq to yiktawindsø'øgi? Nnija'wa'amp ndøm ku ja maxqandsaq kyaDiosi, pø tu'ugyixi ja Dios. ⁵ Jaa dø'øn ja jaa'y pøn wændip ku dios ja janch namaydi ya naxwiñ jøts jam tsajpjotp, ja'agøjxp idø'øn may ja dios ja jaa'y twindsø'øgidi ku jade'en tja'gyukidi, ⁶ tu'ugyits adøm ja nDios, ja Dios Teety. Ja Dios Teety idø'øn tuki'iyi to tyik'oyi, jøts ja' adøm idø'øn nnijuuky'ajtyindip jøts ja ndamijojaxin ja ndsinqañyin. Jats tu'ugyi nayide'en ja windsøn, ja nwindsøn'ajtim Jesucristo, ja'agøjxp idø'øn tuki'iyi to y'oyi, jøts ja'agøjxp adøm idø'øn nayide'en to xyikøjyim ja Dios.

⁷ Jats may ja janchja'wibi jaa'y pøn tkaja'gyukidip ja yjade'embi tsinqaqayin. Pøn jaty y'ijty ttawindsø'jkidip ja kyaaky ja tyojkx ja maxqandsaq ku ja ixyam ja'abi tkaydi ttojkxti jade'eñim ja wyinmaydi ku ja nay ja'abi dios yja' jadigojk ttawindsø'øgidi; kuts ja tpawinmaadyøkid jøts ja tpøkyja'widi ja'agøjxp ku ja tkaja'gyukidinim. ⁸ Kidi ja' adøm inet jawaani øy nwibejtint pøni kaa'yimp jøø'kxiimp, nayi ka'ats adøm inet jawaani ka'øy nwibejtint pøni ka' adøm ngaa'yim. ⁹ A'ejxits mee m'adø'øtst, o

meets ja xka'aty xojkxt jøts ka'ap ja mmigu'uk ja xukpøkyjawanidit, pøni pyøkyjawanidipnim ja tuki'i'yı ja'agøjxp ku ja yjanchja'win ja ka' yikxon tyuu'døkidinim. ¹⁰ Ku n'ukpiktaajkint, yam mets ja mjanchja'win tø myøji myayi jøts m'a'ejxnaxit tu'uk ja mmigu'uk pøn okwa'añi ja yjanchja'win tyiktso'ondakpnim, ku mets jam mdsøøni agujk jotkujk jøts xjii'kxy ja kaaky ja tojkx midi tø yiktawindsø'øgi ja maxandsaa uk øy ti jadu'uk awanax, ñka'ats idø'øn ndejin mbaduu'miyit nayide'en ja mmigu'uk pøn m'a'ejxnaxiyip? ¹¹ Jøts jade'en xyiktuu'tigø'øty ja mmigu'uk ja'agøjxp ku kyatiynim kyaduda'akñim ja yjanchja'win, yam ja Cristo ja tø yjagu'oogiyi. ¹² Jade'ents idø'øn, ku ja pøky jade'en xu'undit jøts ja mmigu'uk yjanchja'win xyik'amutskiyidit, ja Cristo meets idø'øn kø'øm jade'en mmidundigøøpy. ¹³ Pøni ndukpaajtyimpts tam adøm jade'en ja nmigu'uk ja tyuu'tigø'øyin ku yikjii'kxy ja maxan wyindsø'jk'ii'ñ, paat'ajtiyipts ne'egi jøts ja ka'ap jade'en n'uktu'una'ant jøts ja nmigu'uk jade'en ja pøky ngadanil'ejxa'ant.

9

Ti dø'øn paat'ajtiyip ja nwindsøn'ajtim kyudanaabyi

¹ Tø øts idø'øn ja Dios xaguwanı jøts øts ja ngudanit jøts ja kyajpxy y'ayuuujk ja nnigajpxiyit, niøn jaq'ysts ø xkapaqat'aty jøts øts ja ndukmado'ot pøni ti jaty ø ndumpy; øø tøxi øts ja nwindsøn'atim Jesucristo n'ixy, meetsts idø'øn ndunkjøøjp'ajtpy ku øts ja nwindsøn'ajtim tyunk nbadøjkiyi. ² Jaa

abiky ja jaa'y pøn ø xka'ejxkaptip jøts ku øts ja Dios xkudanaaby'i'aty; meetspits mbaqat'ajttip jøts øts jade'en x'ejxkaptit, pø øtsxi meets ja nwindsøn'ajtim tø ndukmibiky, kuts meets jade'en tø ndukmadøy ja janchja'win jade'ents idø'øn wyingaxi'iky jøts ku øts ja Dios njanchkudani.

³ Yide'en øts idø'øn n'adsøy pøn jaty ø xpagajpxtip: ⁴ Xpaat'ajtp ø nyikmo'ot ja kaaky ja uujkin, ⁵ jøts xpaat'ajtp ø nayide'en jøts ja nnidø'øxy midi tjanchja'wip ja Dios nbawaqamit sam ja jadu'ukpi kudanaaby'itøjk ttundi, mørøt ja nwindsøn'ajtim y'ajch y'uch jøts nayide'en sam kø'øm ttuñ ja Pedro. ⁶ ¿Ja ti øts yø mørøt ja Bernabé xpaat'aty jøts øots ja ngaaky ndojkx nnidu'un? ⁷ ¿Ma dø'øn ja soldadi kø'øm y'uknay'ijxyiyi? ¿Ma dø'øn ja jaa'y tka'ukjii'kxy pøni ti tø tni'ipy jøts pøni ti tø tyikpidi'iky? ¿Pøn idø'øn nugo ukuborreegi'ajtp jøts niti kyagida'anxiyi? ⁸ Kidits mwinmaydi ku øts jade'en kø'øm n'awiji, nayide'enxi ja Moisés kyutujk wya'añ. ⁹ Pø yide'enxi jap jaabyety y'ity nøky kyutujkijxpy: "Kidi ja mdsakaq ajeñ xyik'okti ku ja xyiktunwa_andit." Kidi ja'agøjxp ja Dios jade'en wyañañ ku ja tsakaq ja ja'ayi tjotmay'aty, ¹⁰ pø adømgøjxpxi dø'øn ja ejxpajtin ja jade'en tpikta'aky. Paty ja kutujk jade'en yikjaay ku adøm ja y'øy'ajtin ja pya'ayo'owin ja xuktanitsoojkim; pø nayide'enxi ja jii'kxy ja pyaat'atyiyi pøn yuup tump sam ja' pøn yikpidi'jkpy ja pikta'aky. ¹¹ Tøts øots ja Dios kyajpxy y'ayuujk namyayi nni'ipy ma meets jam, ¿ka'ats idø'øn y'øyi jøts mee n'amido'ot ja pudøjkin? ¿Ti øø ndajujky'atp ya? ¹² Pøni

m'amidoojip mee tigati ja wenk jaa'y jøts meets ja xmø'øy, jawaani kajats øø xpaaat'aty.

Ørts øots ja jade'en xjapaat'aty, ka'ats øots ja nbayø'øy kuwani; nmidaanaapy øots ja' pøni ti øots xjaajtp pøni ti øots xka'ejtxip jøts øots jade'en ngayiktuu'duky ja Cristo y'ixpøjkin ja Cristo y'ana'amin. ¹³ Mnija'wip meets ku ja jaa'y pøn tsaptøjkjotp ttundip, tum ja' ja tyajujky'ajttip pøni ti jam tøkip. Pøn ja altajr jam t'ejx'ejtip ma ja jiyujk jam y'øøky midi windsø'jkin'ajtp, ja'abi tsu'uchts ja yikmøødyip. ¹⁴ Nayide'en ja nwindsøn'ajtim Jesucristo tø yjanimy jøts ja tyunk ja ttajujky'attit pøn ja nitsoojkin ayuujk tnigajpxtip. ¹⁵ Nijuuni ja'abi winmaaq'ñ nugo ngadamajada'aky, ni ja'agøjxp mee nganijayi jøts mee xmo'ot o tigati. ¡Wan øts jade'en ne'egi t'øøky, pø ndajotkujk'ajtpyxi øts ku øts jade'en ndsøoni!

¹⁶ Kuts idø'øn ja Dios y'øy'ayuujk y'øwyinmaaq'ñ njanigajpxy, ka'ats øts ja nnadyamøjpikta'agyiyyi, pø kø'ømxi øts ja tø ngupiky ku øts ja tø nyiktaguwani. ¡N'ayøøy øts ku øts nganigajpxt! ¹⁷ Pøni kø'øm tsojkingøjxpts øts nduñ, n'awijxpyts øts ja n'øy'ajtin. Ka'ap øts jade'en ja ndunk, jabi kø'ømxi ja Dios xwi'ixy ku øts ja øybì tankjøøjp xmø'øy jøts jatyi ngupøjkøjy. ¹⁸ Ja' øts idø'øn ndajotkujk'ajtpy ku øts ja nitsoojkin ayuujk nnigajpxy jøts ø niti mijuu'ñ nga'amidøy, øy ja jade'en xjapaat'aty jøts øts ja' ndajujky'att.

¹⁹ Ots ø nípøn njagamidoñ, tøts ø kø'øm nadyamidsøkyi jøts mee nmidiu'unt, jøts ja Cristo jade'en ndukpaat'tit. ²⁰ Kuts ja israelit jaa'y nmøøtsøønidí nayide'ents ø ndsøoni sam ja

chøønidì jøts øts ja Cristo jade'en ndukpaattit; ja Moiséssxi øts idø'øn ja kyutujk n'atskupøjkip øy øts ja'abi kutujk xjagapaat'aty. ²¹ Kuts øts abiky nnøjkxmi mä ja Moisés kyutujk tkayiktuujnidì, nayide'ents ø ndsøøni sam ja chøønidì, øy øts idø'øn ja Dios kyutujk ja'ayi nyikmøjtøjkiyi, pø ja Cristoxi øts ja y'ana'amìn nbaduujnip. ²² Kuts ø nmøøtsinaamyidi pøn ja yjanchja'win tyiktuu'døjkyidipnim, ka'ap øts ja nugo nyik'amutskidi, ni ja namyikaxi'ajtin ngayiktuñ, nayide'en ø tø nnabyikta'agyi sam ja'adi jøts øts ja jade'en nyikjotkujk'atti. Tøts idø'øn tu'uk tu'uk nja'gyuki pøni sa ja chøønidì, jøts øts ja jade'en ndukpaattit ja Cristo. ²³ Ja'agøjxp øts jade'en nduñ ku øts ja nitsoojkin ayuujk nnigajpxwa'añ, jøts ø wyinaty nayide'en nbåat� ja kunuu'kxin ja øy'ajtin møøt ja'adi pøn jaty tjanchja'widip ya'atpi ayuujk.

²⁴ Mnija'wip meets ku jaa'y pyujtkejpxti, namay ja yjaputti tu'ugyits ja pujtkejpxpí myajada'aky jøts ja tpiky ja ñibuty. Paty idø'øn nayide'en mbuttit jøts ja øy'ajtin xpaattit. ²⁵ Pøn jaty tuki'iyi t'a'ejxigýøjxp ku kyuyatwa'añ jøts kyuyajta'aky yikxon, ka'ats ja sa yjaty ku tyimgyuyaqtjni. Ja'agøjxpts ja jade'en kyuyata'akti jøts ja tpøktit ñiguyaty midi idø'øn ja kuyajtpi pyøjktip ku ja myajada'akti, jøts ka'ap ja xemikøjxp y'ity; ja xemikøjxp pikta'aky adøm ya naxwiiñ nbatnajxyim midi wyinaty yikmøø'yimp xemikøjxp. ²⁶ Nnija'wip øts wa'ats midi'ampy ø nnijkxpy ka' øts nugo nbuty wimbeets kugoots; nbåatp øts idø'øn ja' midi ø nbåatwampy, ka' øts nugo n'adi'ich. Ka' øts jade'en nugo ngojxwidity

jøts øts nika' ti ndukpety. ²⁷ Jawyeen øts yikxon nnay'a'ejxiyi jøts øts nne'kx ndukmibiky pøni sa øts idø'øn ja ndsøky pøni ti øts idø'øn ndunwampy, jøts øts kidi nøjkx jawyeen tsø'ødyumbim njaty Dios wyingujkp yam øts ja jaa'y tø ndukmadowdi sudso'ampy ja nitsoojkin ja pa'ayo'owin ja tpøattit, jaa ku øts ne'egi nga'ukpøjknit ja niðuñ.

10

*Ja' yikni'ana'amp jøts ja maxandsaa uk øy ti
jadu'uk awanax kyayikdiosjawit*

¹ Mnijawidip migu'uktøjk idø'øn ku ja møjaa'dyøjk niduki'iyi ja Dios ja yoots tyaduu'wajidøø, jøts nayide'en niduki'iyi ja Dios øy tyuktanajxidøø ja Tsajpts Mejy. ² Jade'en idø'øn ja ndejint niduki'iyi tpøattøø ja nøbajtin jøts ja tmøøt'etti Moisés. ³ Niduki'iyits nayide'en tjøø'kxtøø ja tsajpjotpit jii'kxy, ⁴ jøts nayide'en niduki'iyi t'uktøø ja tsajpjotpit nøø. Pø ja'abi nøøjxi ja y'uktøø midi jam mu'tp tsagøjxp midi payø'øyidip. Ja Cristots idø'øn ja myøk'ajtin ñankyejxiø jam tsagøjxp. ⁵ Namayts ja'adi pøn ja Dios Teety tkamimadooodøø jøts ja jamyi abæk etjotp y'oo'knidøø.

⁶ Ejxpajtin adøm idø'øn ya xmø'øyindip paty idø'øn ja jade'en yjatti jøts adøm ja ka'øybi tsinæa'yin ngatsojkint sám ja ttundi. ⁷ Paty kidi meets ja maxandsaa xwindsø'jkyinidi sám ja ttundøø niwinaagin, jøts sám idø'øn ja yiknigajpxy nøkyjøtpy: "Winets ja jaa'y kaabyi ukpi y'ixakti jøts twinxødundi ja maxandsaa." ⁸ Ka'ap adøm idø'øn xem yam nugo nnamyøøt'ajta'ant kija'

uk tu'ugyi ja amajtsk jaa'y tyik'ettit ja ñiyaal'y uk ja ñidø'oxy, sam ja jaa'y tkamøjpiktaktøø winaqagin ja y'amajtsk'ajtindi, jøts ja'ayi tukxøowyi tku'oo'kyidi ja pyøky ni'ee'pxigøøk mil. ⁹ Ka'mibaat ja Dios tyuda'aky'ajtin ndana'ejxin uk nugo nwìnmaaq'ñ ejxwa'anin sam ja jaa'y winaqagin y'adøtstøø midi ja tsaa'ñ ojts yikxon chu'tstigøyidi. ¹⁰ Jøts nisa xkatejtja Dios pøni sa ja mduñidi. Ka'ap jade'en m'adø'øtstit sam winaqagin y'adøtstøø ku ja tka'ødyejti ja Dios, ja' midi ojts tyagida'agyidi ja ayo'on ku Dios ja tyumbi tkejxy midi ja o'jkin ojts tyukpaadyidi.

¹¹ Adømgøjxp idø'øn jade'en ja mœjaa'dyøjk yjajttøø kyubattøø, jøts nay adømgøjxp ojts jaabyety jade'en tyañ jøts ø n'ejxpajt'ajtint jøts jade'en ngadsinaaq'yint sam ja chinaadyøøixa ja nwìndson'ajtim Jesucristo wyingtoni ja tyiidyu'unin xøøw. ¹² Pøn jaty yjawí nisa kajattip, pøn dø'øn yjawí øy tsinaadyip, wants ja tnay'ejx'ityidi jøts ja kyawinmaaq'nmya'attit. ¹³ Nay ja ayo'on midi ixyam mdanajxtip ku yik'ejxmåtsti ja mjanchja'windi pøni mjanchpadundip idø'øn uk ka'; nayja'abi ayo'on idø'øn øy pøn tø tpøaty tø t'ixy. Øyts meets ja Dios x'ajot'att jøts ja m'agø'dukidit m'axajtukidit jøts niyøjxk xanæxtit ja ayo'on midi kamidanaañi. Kuts wyinaty ja ayo'on tyimyjawani møk mbaadyidi, ja Diosts mmo'ojidip ja wyinmaaq'ñ sudso ja xnimadø'aqtit.

¹⁴ Paty migu'uktøjk idø'øn ja maxandsaq uk jadu'uk øy ti awanax xka'ukwindsø'jkiñidit, ixmåtsti ø yjade'embø tsinäa'yindi. ¹⁵ Wa'atsxi xnimadowdi sa mee nnøjmi wiiy kejy ti sa m'ejxiøi.

Kø'ømts yikxon x'ukpayø'ødyit pøni janch kidi yjade'eni sa ø nwq'añ. ¹⁶ Ku adøm ja tsapnøø kunuu'kxy n'uujkyindi ja Dios adøm idø'øn jade'en nwindsø'øjka'am, ja Cristo dø'øn ja ñi'jpy namyayi n'uujkyindip; kuts adøm ja tsapkaaky nyikwa'kxyindi ja Cristots adøm ja ñe'kx namyayi njii'kxyindip midi ja y'øy'ajtin xukpaajtimp ku ja ojts xku'o'jka'am jam kruskøjxp. ¹⁷ Øy adøm njanamaya'am tu'ugyits adøm ja tsapkaaky ndamujkyindi, patyts adøm jade'en amuum tu'ugyi n'ijtyindi Dios wyingujkp pøn jaty tjanchja'widip ja Cristo.

¹⁸ Ejxtits ja Israelit kajp ma ja jaq'y tkaydi tjøø'kxti ja windsø'jk'ii'ñ; ja'ats idø'øn ja ñamyayi tu'ugyi yik'ejtidip, tu'ugyi ja tumjade'en wyinmaydi nixem niyam. ¹⁹ Ka'ap øts idø'øn nnimy ku ja maxandsaq uk jadu'uk øy ti awanax yujkyidi, jøts ka'ap ø nnømi ku ja tsu'uch jawaani øy midi ja yiktawindsø'jkidip. ²⁰ Yide'enxi øts idø'øn ja njatiyy, pøn jaty ja Dios tkanija'widip jøts ja windsø'jkin ja tpikta'akti tsamaxan uk øy ti jadu'uk awanax wyindum y'agø'øm, ja miku' dø'øn ja wyindsø'jkidip jøts ka'ap ja Dios; ja'ats meets idø'øn ngadamidsøjkpy jøts ja miku' yja' xkupøjkidit. ²¹ Ka'ap ja mbaat'atyidi jøts mee majtsk jøøjp mdsøønit yam meets ja nwindsøn'ajtim ñi'jpy xja'uujkiyi, jøts nayide'en x'uujkmiyidi ja miku' ñøø; yamts meets ja nwindsøn'ajtim ñe'kx xjøø'kxiyi jøts ja miku' njii'kxy xjøø'kxiyidi. ²² Ja ti adøm tø ndøjkiñam? ¿Nugo taguyajtpi jøts jade'en ja nwindsøn'ajtim nugo nyik'ambøjkint? Ja tyimyabaat adøm

nmøj'ajtìn jøts adøm ja ne'egi nyik'amutska'ant?

Ka'ap ja ngø'øm ja' n'ixa'ayint, ja tsojkin ja pa'ayo'owin ne'egi ndamijojxin ja nmigu'uk

²³ Janch ja jade'en idø'øn sám ja ayuujk wya'añ ku o tigati nduu'nint, nipøn ja xkadabayø'øyint; øy dø'øn ja jade'en yjawa'añ, ka'ats tuki'iyi y'ødyuñ pøni ti yiktump; jabí ka'axi ja Dios yjanchja'win jade'en tuki'iyi xatøjka'ant. ²⁴ Ja nmigu'uk adøm idø'øn ja y'øy'ajtìn n'ixaqjya'amp jøts ka'ap ja ngø'øm ja' nugo ndunk'ajtint ja'ayi.

²⁵ O mee tigati xjøø'kxt pøni ti jaty mjuudyip maayjotp, ka' xyiknidøwidit mä ja tyiktsoondi, ku nugo mnadyagumayidit; ²⁶ jabí nwindsøn'ajtimxi ñaxwii'ñit yø' jøts tuki'iyi pøni ti jaty ya ejtp naxkjixy.

²⁷ Pøni mwaaqidipts ja jaa'y kaabyi pøn ja janchja'win tkamøøt'ajtp, kupøkti panøjkxti jøts kaydi jøø'kxti pøni ti myikmøødyip jøts ka'ap ja xyiktø'ødit pøni ti pøni pøn yiktawindsø'øgi, jøts niti xkagumayjawidit. ²⁸ Kuts jam tu'ugin ja jaa'y jotmøñ wya'ant ku ja'abi tsu'uch ja maxandsaa tø yiktawindsø'øgi, ka'ats meets ja xjøø'kxt, jøts ja mmigu'uk xkananqñagyumayiyidit ku ja nugo ñabyøkyjawiyidit ja'agøjxp ku ja janchja'win ja okwa'añ tyiktøwdinim tyiktudaq'aktinim. ²⁹ Ja mmigu'uk øts idø'øn ja wyinmaa'ñ nnigajpxip, ka'mets mja'.

Jamts pøngapøn tyiktø'ødit jøts wya'andit: “¿Sudsots ja wenk jaa'y nyikmøjtøkiyit ne'egi ja wyinmaa'ñ jøts øts nja' nika'? ³⁰ Jabí n'ajot'ajtpyxí øts ja Dios ku ngay njii'kxy, ¿tits øts idø'øn xabagajpxtip kuts ja'abi kaaky ngupøkt?” ³¹ Ots

ja yjade'eni, pøni mgaadyip m'uktip uk pøni ti jatyts mdundip, tum ja Dios køjxp ja xu'undit jøts ja jade'en xyikmøjtøkidit. ³² Kidi mee xuñ midi ja mmigu'uk tyadigø'ødyip: ni ja israelit ja'a'y jade'en xkatu'undit, ni ja' pøn ka'israelit ja'a'y'ajttip, ni ja' pøn ja Dios Teety tø myø'øyidi ja janchja'win jøts ja nwindsøn'ajtim tmibøjkkit. ³³ Kuts øts, ja' ø n'ixaapy sudso øts ja nmigu'uk nyikjotkujk'att; ka' øts ngø'øm øy'ajtin n'ixa'ay, jøts øts nmigu'uk yikxon chøønidit jøts wyinaty ja nitsoojkin yikmo'odi.

11

¹ Tundi nayide'en pøni s̄ø nnajtstuni, pø nay ja Cristoxi ø nni'ejxuujtip ja ch̄inaaq'yin.

Sa yjaaq'y'attit ja tø'øxyøjk ma ñamyukyidi ja janchja'wi bidi

² Migu'uktøjkti njanchtakajxakpy meets ku ø xja'myatsti, jøts ku nayide'en xpadundi ti jaty tø ndukmadowdi. ³ Ja'ats ndsøjkpy jøts xja'gyukidit ku tu'uk tu'uk ja yaa'dyøjk ja Cristo ñigubajk'atyi, jøts ku ja yaa'dyøjk ja ñidø'øxy tnigubajk'ajtm̄i jade'en s̄am ja Dios Teety tnigubajk'aty ja Cristo. ⁴ Pøni ka' ja yaa'dyøjk ñagyujuptu'udyi ku Dios t'ajot'aty uk kuts ja Dios yja' tjanigajpxi, kyamøjpiktakpy idø'øn ja Cristo ja' pøn nigubajk'ajtiyip. ⁵ Pøni ka'ats ja tø'øxyøjk ñagyujuuxyi ku ja Dios t'ajot'ajtpi tyøki, uk kuts ja Dios yja' tjanigajpxi, kyamøjpiktakpyts idø'øn ja ñiyaa'y ja', nayide'enxi ja tpøtni kidi ja jeexyip tø ñagyucaa'ptu'udyi. ⁶ Pøni ka'ap ja tø'øxyøjk ñagyujuuxyi, wants ne'egi

tnagyuka'aptutkixyi. Pøni tyatsø'ødyumpts jade'en ja kyubajk keepy, wants ne'egi tpikta'aky ja kyujuux. ⁷ Nagyuujptu'udip idø'øn ja yaa'dyøjk pø ja Diosxi ja myøj'ajtin ja chuj'ajtin ja yiknigaxø'jkip ku ja nayide'en tø yik'ø'yiyi sám ja Dios t'ixy. Jøts ja tø'øxyøjk ja ñiyaa'y myøk'ajtin ja yiknigaxø'jkip. ⁸ Kuxi ja Dios tyik'ø'yiyii'ñ pø ja yaa'dyøjkxø ñikøjxp ja Dios tju'jty ja tø'øxyøjk. ⁹ Yaa'dyøjkøjxpø ja tø'øxyøjk y'ø'yiyii'ñ, jøts ka' tø'øxyøjkøjxp ja yaa'dyøjk y'ø'yiyii'ñ. ¹⁰ Patyts idø'øn ja tø'øxyøjk ñagyuuuxit jøts ja jade'en tyiknigaxø'økt ku ja yaa'dyøjk ja y'an'eemyi, jøts ja Dios y'ankilis nayide'en yjotkujk'attit. ¹¹ Nnija'wa'ampts adøm, ku ja janchja'win nmøøt'ajtyindi, ku ja yaa'dyøjk jøts ja tø'øxyøjk kuwanı tu'ugyi y'letti. ¹² Janch tiyxı dø'øn ja' ku dø'øn ja tø'øxyøjk y'ø'yiyii'ñ, ja yaa'dyøjkts ja Dios yiktuun, nayide'en yjanchi ku tø'øxyøjk ñikøjxp kye'exy yaa'dyøjk ya naaxwiiñ; ja Diosts jade'en wamp.

¹³ Kø'øm mee x'uknigajpxt pøni øyide'en ku ja tø'øxyøjk ja Dios t'ajot'att kuwa'ats, jabi ka'axi ja y'øyi. ¹⁴ Tsø'ødyumbim ja yaa'dyøjk pyidsimy ku ja wyaa'y ja tyikyon'anaxy, ka'ap adøm jade'en ngostumbri yø'øyindi. ¹⁵ Yiktakajxakpts ja tø'øxyøjk ku ja wyaa'y ja yøñ, pø tøxi ja yiktanibiktaagi jøts ja wyaa'y ja kyubajk ttanipett. ¹⁶ Pøni pønts tkaja'gyukiwyamp sa øts idø'øn tø njawa'añ, ñijawip idø'øn ja' ku øøts ka'ap ja wenkpi winmaaq'ñ nyiktuñ jøts ni ja' jade'en kyawinmaamyidi pøn jaty ja Dios tø wyaa'mukyidi wyejtsmukyidi øy madssoo, ja'agøjxp ku ja tø tjanchjawiñ ja Dios.

*Ku kya'ukyikmøjpiktakni ja nwindsøn'ajtim
kyaqayik'y'ujkik midi ja ñajtstu'unip ku jay'a'ux'ajty*

¹⁷ Ku meets yám nnijayí kidi ngajxa'akwampyíp meets, ku yjawi mjanamyukyidi niwine'en ja

mga'opyidsø'omxiyidi jøts ní mga'ödyuñidi ja yjawi. ¹⁸ Jade'en øts ja jaq'y xumdamimadya'akti kuk mee mjanamyukyi mnawya'kxibik meets jam jøts mganamyee'kxyidi; nmibijkpy øts idø'øn, pø jade'en idø'øn jam yjanchjaty. ¹⁹ Kuwanidsik

idø'øn mnawya'kxitid jøts idø'øn ñigaxø'øktit pøn idø'øn Cristo yja' yjanchpaduuñidip, jøts pøn idø'øn nugo nadyejidip jøts ku Cristo ja tpadundi.

²⁰ Kuts meets idø'øn jade'en mganamyee'kxyi, nika'ats meets ja nwindsøn'ajtim Jesucristo y'a'ux x'ukja'gyukiniyi, ni xkanijawidi pøni sudso yiktuñ.

²¹ Anaxukpimxi meets jam kø'øm a'ux xninijkxy ku ja ka'ayin tpaqty, jamts muum kyaku'uxyidi jøts muum nugo tyimy'ukmuktigøøñidi. ²² ¿Ti ka' meets mdøjk te ma' mga'adyit? Mgamoj'ejxtipxi dø'øn ja janchja'wip jaq'dyi ku jade'en m'adø'østi, jøts namyikaxi mwìnbiðsømdí ku ja mmigu'uk pøn ayoodip jam xwingayidi, jøts ja nugo xuK'ayoojidi. ¿Sats meets idø'øn nnøjmit? ¿Ndsachkajxa'akp meets idø'øn ku jade'en m'adø'øtsti? ¡Nijuuni xøøw meets ya'atpi ngadakajxa'akt!

*Ku ja nwindsøn'ajtim yjaq'uk'a'ux'ajtni møøt ja
pyabøjkpitøjk*

²³ Pø ja nwindsøn'ajtimxi ø kø'øm tø xmø'øy midi mee tø ndukyikyuwy. Ku dø'øn ja nwindsøn'ajtim Jesús wyinaty yikøyakwani ux, nay ja'abi uxts idø'øn ja tnixajiyiñ tu'uk ja tsapkaky, ²⁴ kuts ja Dios Teety t'ajot'ajty jøts tkajxajky, wìnets ja

t'adujkpajky ja tsapkaaky jøts wyaañ yide'en: "Kaydi, øts idø'øn ya'at nne'kx midi meets mnitsoojkingøjxp inet yikøyakp. Mdu'undip idø'øn ya'at jade'en jøts øts xja'myajtspajt'attit."

²⁵ Kuts idø'øn ja wyinaty tø y'a'ux'atti ixjats ja uujk'iñ tu'uk tnixajiyiñ jøts yide'en wyaañ: "Ya'at tsapnø'uujkin idø'øn ixyam tamp ejxpajt ku ja Dios Teety ja wyandä'aky tyik'aduky sam ja ttami'awa'aniyiñ ja naqxwiiñit jaa'y ja nitso'ok'ajtin. Ixyamts idø'øn ja cho'onda'aky ku øts nni'jpy inet wyidsu'unt wyidaxt. Kuts ya'at tsapnø'uujkin xumitu'undit, øts nja'myajtsingøjxp yø x'adunidit." ²⁶ Jade'ents migu'uktøjk idø'øn, ja nwindsøn'ajtim mee mja'myejchp ku meets ja tø mgu'oogiyi ku jade'en ja tsapkaaky xka'adyit midi namyayi ñe'kx'ajtpy, jøts ku ja tsapnøø jade'en x'ukunaxit midi ja namyayi ñi'jpy'ajtpy kuniim ja mye'ent jadigojk.

Sudso ja nwindsøn'ajtim kyaqayik y'uujkik yikupøkt midi ja ñajtstu'unip ku ja y'a'ux'ajty

²⁷ Ja nwindsøn'ajtim Jesucristo yjamidundigøøpy pøn idø'øn yikxon tkajøø'kxp tka'uukp ja nwindsøn'ajtim ñe'kx jøts ja ñi'jpy.

²⁸ Patyts idø'øn yikxon jawyeen xpawinma'adyit sa ja mdsinäq'yin xyikyø'ødyi, namga'anim wyinajty xni'äwidì ja nwindsøn'ajtim ñe'kx jøts ja ñi'jpy. ²⁹ Ja kyø'øm ayo'onxi ja y'ixaapy pøn nugo tni'ä'wip ja nwindsøn'ajtim chæpnøø'uujkin.

³⁰ Ja'agøjxpxi dø'øn may ja mmigu'uk pa'ämøøtti jøts kajotmøjkti, jøts muum tø y'oookti. ³¹ Kuts adøm kø'øm a'ejxi ndu'unint, ka'ats ja nwindsøn'ajtim jade'en xiidyu'unint. ³² Kuts adøm

ja nwindsøn'ajtim xiidyu'uñim ja'agøjxp ja ttuñ
jøts ja xukja'gyukant jøts ngamøøtkudigø'øyindit ja
pojkpitumbi jaa'dyi midi tkajanchja'widip ja Dios.

³³ Paty migu'uktøjk idø'øn, ku mnamyukidit
jøts ja nwindsøn'ajtim ja chapnøø'uujkin
x'atsja'myatsidit, nay'awexidi jøts tu'ugyi
mdsapnøø'uuktít. ³⁴ Pøni jam pøn yu'øøky, wan
jamyi ne'egi kyø'øm tøjkjotp t'ukay, jøts ja Dios
wyinaty kyadukuwanjatiyi ku ja tsapnøø'uujkin ja
nugo tyikwa'ant nãnktyamu'ugi nãnktyaku'uxi.
Midi'ibi jaty myiktøødip jaanim øts ja wyinaty
nnigajpxy ku mee n'ats'ext.

12

Ja wijy'ajtin midi ja Dios Espíritu Santo yajkpy

¹ Migu'uktøjkti, jaa ja ayuujk midi ø ndsøjkpy jøts
meets ja xnijawit ku Dios Espíritu Santo tyaky ja
wijnmaq'ñ ja wijy'atín jøts ja tmø'øy ja jaa'y kija'.

² Mnija'wip mee ne'egi wa'ats ku mee wyinaty
xkamibikñim ja nwindsøn'ajtim Jesucristo, ja
maxandsaajimts meets tuluk tuluk y'lijty ja'ayi
mwindsø'jkidip. ³ Paty meets yam ndukmadøy
jøts xnijawidit ku pøn wyaq'ant: "¡Míku' yø Jesús!"
kidi ja Diosip y'Espíritu Santo ja wyinaty jade'en
yikwaajniyip. Ùk jadu'uk pøn nugo wyamit:
"Ja Jesús idø'øn møy windsøn!" tiyts ja wyinaty
yjanchwa'añ pøni Dios y'Espíritu Santo ja wyinaty
jade'en yikwaajniyip pøni ka'ats myigajpxigøøpy
Dios ja wyinaty.

⁴ Mayjøøjp idø'øn ja jaa sa pøn øy tigati tjaty, jøts
kija' ja yikmøøt'aty pøni sa pønjabøn ja wijy'ajtin
tø yikmø'øy, tum Espíritu Santo wyingujkpts ja

chøøñ. ⁵ May tankjøøjp yikmøøt'aty, tu'ugyits ja nwindsøn'ajtim Jesucristo yiktamiduñ. ⁶ Kawinaaq jøøjp ja ødyunk nmøøt'ajtyindi, tu'ugyits ja Dios ja xmø'øyindi. ⁷ Ja Dios idø'øn ja ejxpajtin tu'uk tu'uk tmøøpy ja jaa'y, jøts idø'øn ja tyiknigaxø'økt ku ja Dios Espíritu Santo ja tmøøt'aty, jøts ja niðuki'iyyi yikta'øy'att. ⁸ Dios Espíritu Santo køjxp idø'øn ja Dios Teety ja jaa'y tmø'øy ja wyiji'yajtin jøts ja tiy kyajpxwejtit, jøts nayide'en ja jaa'y tmøømyi ja ixpiky'ajtin jøts ja øy yik'ixpøjktit. ⁹ Jamts ja jaa'y pøn ja Dios Espíritu Santo janch møj jøts janch møk ja janchja'win myø'øyidi, jamts pøn yikmøødyip ja øybi møk'ajtin jøts ja pamaa'y tyiktso'oktit. ¹⁰ Jam pøngapøn tmø'øy jøts ijxyimbi ka'ijxyimbi ja ttu'unt, jøts jam pøn myøøpy jøts ja Dios kyajpxy Dios y'ayuujk ja tnigajpxidit; jamts ja' pøn ja Dios tø tyamidsøjkyidi jøts ja t'ejxkaptit pøn jaty ja ka'øybi winmaa'ñ tyiktundip jøts pøn ja øybi winmaa'ñ tmøøt'ajttip; jamts nayide'en pøn tø yiktamidsokti jøts kawinaaq ja ayuujk tkajpxtit midi ja myigu'uk kyakajpxtip; jamts ja'adi pøn tnimadoodip wa'ats ja ja'abi ayuujk jøts ja tnigajpxti ti dø'øn ja tyijpy. ¹¹ Tu'ugyits idø'øn jade'en y'adi'ich ja Dios Espíritu Santo, jøts idø'øn ja tyikwa'kxy ja wijy'ajtin pøni ti dø'øn ja pønjabøn tyukjatwampy kø'øm ja tø ttanibiktaagi.

Ja nwindsøn'ajtim tnigubajk'ajtp niðuki'iyyi ja jaa'y pøn tjanchja'widip ja Dios

¹² Jade'en idø'øn ja Cristo n'ukpiktaajkint sam tu'uk jaa'y ñe'kx midi janch may tanibiktaagi tum tigach; ots idø'øn ja kø' ja teky kija' ja

tunk tø yiktanibiktaagi, tu'ugyi ja ñe'kx ja y'ity.
13 Nayide'ents adøm idø'øn øy yjapøni, yja'israelit ja'a'yí uk yjaga'israelit ja'a'yí, yjagreciit ja'a'yí, yjamidumbi ja'a'yí uk yjanitøky ja'a'yí, ku adøm idø'øn tø nnøbejtyim tu'ugyi adøm idø'øn ja ne'kx namyayi nyik'øya'am Dios Espíritu Santo køjxp; jøts adøm jade'en ja tu'uk tu'uk tø xatøjka'am.

14 Ka'ap ja ne'kx tukjøøjpyi tmøøt'aty midi jaty ja yiktumpy, pø may jøøjpxi ja tmøøt'aty. Jade'ents ja y'amuum'aty ku ja ka'pxy tmøøt'aty ijxyim ka'ijxyim. **15** Øy yø teky yjawá'añ: "Ka'ap ø nduñ nayide'en sám ja kø' paty ø nípøn xkatunk'att", kidi ja'agøjxpts ja kya'ukpaat'ajtniyit ja ne'kx.

16 Uk y'ukwamít inet ja tøtsk: "Ka'ap øts ja ween tyunk ndujni paty ø nípøn xkatunk'att", nígidi ja'agøjxpipts ja ne'kx ja myajtstuujtniyit.

17 Ku jeexyip tum ween nne'kx'ajtyim, ¿sudsots jeexyip nmadø'øyim? Uk kuts jeexyip tum tøtsk nne'kx'ajtyim, ¿sudsots jeexyip nxuu'ka'am? **18** Tø dø'øn ja Dios ttanibiktaaqjkigyi jxy ti jaty jadu'uk jadu'uk ja ne'kx tyu'undip sám ja kø'øm tø ttsøky.

19 Ku jeexyip tukjøøjpyi y'amuum'aty, ¿mats jeexyip ja maybi tyøkidí midi tyika'pxtip tuk'amuum ja ne'kx? **20** Jabi nnija'wimpts adøm ku mayjøøjp chøkyi winets njaa'gyaxø'jkindit, pø tu'ugyi xi ja ne'kx.

21 Ka'axi dø'øn ja ween tnøjmit ja kø': "Ka'me nyiktunwa'añ"; ni ja kubajk tkaniimaamyit ja teky: "Ka'me n'ajot'aty." **22** Jøts midi idø'øn yjawi ka'a'ejxin kaxø'kp ja' idø'øn ne'egi yikxon yik'ajot'ajtp, ja idø'øn xyikjujky'ajtindip. **23** Jøts midits yjawi kayiktsojkp ja'ats ne'egi n'ejx'ijtyindip jøts ja nnixøjxyim nnipi jkyim;

midits adøm nganąnky'ejxwą'añimp ja'ats adøm janch'amąay ndø'øñim nyu'uchimp. ²⁴ Jade'en idø'øn ja Dios tø xanibiktaajka'am jøts adøm ja ne'egi nmijotigø'øyint midi yik'ejxp ka' tyuñ, ²⁵ jøts kidi ki'abikyip nugo øy pøn tyuñ øy sa, pø nabyudøjkıyidipxi dø'øn ja'adi nixem niyam wan ja sa t'ijxyidi, jøts ja amuum tyikujuky'ettit tuki'iyyi ja ne'kx. ²⁶ Pøni tsaachip o magama tukween ja ne'kx, amuumts ja pøjkpi ambi yikja'wigyixy øy madssoo; kuts øy madssoo tukween yikxon yik'ejxy'ejtmi kunim ja yikxon chø'øky, tyimñejkpts nayide'en tuki'iyyi øy madssoo ja ne'kx.

²⁷ Meetsts idø'øn ñamyayi ja Cristo mne'kx'ajttip jøts jade'en meets ja mbikta'agyi sam ja kø' teky, ween ąaw tyuñ, uk jadu'uk øy ti midi møøt kya'pxy ja ne'kx. ²⁸ Tøts idø'øn ja Dios Teety ttanibiktaagi ti tyu'undip nídu'uk jaty ja jaą'y pøn ja Dios tmibøjktip: midu'uk, ja nwindsøn'ajtim kyudanaabyitøjkti; mimajtsk, pøn tnigajpxidip ja Dios kyajpxy ja Dios y'ayuujk; midigøøk, pøn yik'ixpøjktip pøn kajpxwejtip; jøts nayide'en pøn ijxyimbi ka'ijxyimbi ttundip, møøt nayide'en pøn ja pamaa'y tyiktsoktip tyikmøkpøjktip, møøt ja pudøjkibitøjkti, jøts nayide'en ja ana'ambitøjkti, møøt ja'adi pøn tkajpxtip ja wenk ąaw ja wenk ayuujk pøni sa Dios ja kø'øm yikajpxwą'añidi. ²⁹ ¿Pønts idø'øn janchja'wibi'ajttip? ¿Nidukil'iyyi ja nwindsøn'ajtim tkudanidi? ¿Tum ja'tnigajpxidip ja Dios kyajpxy y'ayuujk? ¿Tum ja' yik'ixpøjktip? ¿Uk tyumdundip idø'øn ja ijxyimbi ka'ijxyimbi? Ka' yjade'eni. ³⁰ ¿Tyumøøt'ajttip idø'øn ja møk'ajtin jøts ja pamaa'y tyikts'o'oktit? ¿Uk kyajpxtip

idø'øn niduki'iyi kawinaak ja kanimadooni ayuujk? Ùuk ñimadoogøxtip idø'øn pøni sa dø'øn ja wenk ayuujk wya'añ? Pø ka'axi. ³¹ Tajotigøyt sudso xpaattit yø'øbi øy'ajtin sudso ja Dios mgunuul'kxitit jøts myikwejidit myikajidit. Ixyamts mee nduknijawiwya'añ ja jawaani øybì tuu' sa øy tsuj njaa'y'ajtindit.

13

Ja tsojkin ja pa'ayo'owin

¹ Ku njakajpxt kawinaak ja wenk aaw kawinaak ja wenk ayuujk øy yjatsajpjotpit ayuujki uk øyts yjanaxwii'ñit ayuujki, pøni ka'ats øts ja tsojkin pøni ka'ats øts ja pa'ayo'owin nmøøt'aty, nayide'ents ja tpøtni sám tu'uk ja tambur tawa'ats midi nugo jagojkp, uk sám ja platiy midi nugo na'amp. ² Øy øts jeexyip ja Dios kyajpxy ja Dios y'ayuujk tuki'iyi njanigajpxi, uk njanija'wígyixyts øts tuki'iyi ti jaty memp ti jaty kidaçkp midi ka' pøn t'ijxñim midi ka' pøn tnijawinim, uk njamøøt'atyts øts tuki'iyi ja ixpiky'ajtin ja wiijyajtin, uk nja'ajot'atyts øts ja Dios kawine'en ku øts ja ijxyimbi ka'ijxyimbi njatuñ jøts øts ja kojpk ngiidyigach, pøni ka'ats øts ja tsojkin pøni ka'ats øts ja pa'ayo'owin nmøøt'aty nitits øts mibaat ngawa'añ, tyimñugo øts iiy. ³ Uk njadagumaagyijxpyts øts ja ayoobi ja'a'y tuki'iyi ja nbikta'aky, uk njanagyøyakyits øts jøts øts ja ja'a'y xyiknitø'øty Dios køjxp, niwine'enin øts ja ngadamajada'akt, pøni ka'ap øts ja tsojkin, pøni ka'ap øts ja pa'ayo'owin nmøøt'aty.

⁴ Pøn tsojkp pøn pa'ayoop, tuda'aky ja yja'a'y'aty; jøts øy ja'a'y ja', ka'ap myigu'uk ja øy ti tamie'ekyi

uk niti tkamo'owa'añ; jøts ka'ap ja ñamyikexyi, ni kyanadya'agajpxiyi ja' pøni ti ja tyumpy.

⁵ Ka'ap ja ka'øy'ayuujk ja ka'owyinmaaq'ñ uk ja ka'ochinqaq'yin ja ttunk'aty; jøts nika' ñadyamidojkijxyi tuki'iyyi yam ja myigu'uk y'ayøy wyinmay; ka'ap ja tuki'iyyi tta'ambiky jøts nika'ap ja ejtp y'ekyi. ⁶ Ja y'ochinqaq'yin ja myigu'uk ja tyadaxondakpy, kidi kya'ochinqaq'yin ja ojts ttadaxonda'aky. ⁷ Pøn tmidanaapy tuki'iyyi pøni sa yiktuñ jøts pøni sa yiknøjmi, jøts jyøp'ijxpy ja' ku kuwanı ja tsojkin ja pa'ayo'owin myøjtøki, jøts ka'ap ja tigati tta'amutski, ejtp ja tyuda'aky'ajtin ja ttamajada'aky.

⁸ Niжууни ja tsojkin ja pa'ayo'owin kyagudigøy. Ja'tp ja et ja xøow ku wyinaty ja kajpxy ja ayuujk kya'ukyiknigajpxnit midi ja Dios yajkpy, jøts wyinaty naye'en kawinqaq ja wenk aaw ja wenk ayuujk kya'ukyikajpxni, jøts wyinaty ja ixpiky'ajtin kya'uktuni. ⁹ Ka'ap adøm tuki'iyyi ka'pxy nnija'wa'am, jøts nika' ka'pxy yiknigajpxy ja Dios chojkin ja Dios pya'ayo'owin midi adøm ja xjadukmado'owimp. ¹⁰ Kudigø'øpyts ya'atpi nija'win ku wyinaty tuki'iyyi n'ijxyim nnija'wa'am pøni sa dø'øn tyiyi kya'pxyi tuki'iyyi.

¹¹ Kuts y'ijty nmutsk'aty, mutsku'ngin øts y'ijty ngajpxy nmadya'aky, mutsku'ngin øts y'ijty nwinmay, jøts mutsku'ngin øts y'ijty naye'en nja'gyuki. Kuts ø nyaa'knqaq n'ixmatskøjxni øts ja mutsk'ajtin. ¹² Nayide'ents adøm ka'ka'pxy ja Dios yja' nnija'wa'am, winjo'ximp adøm yjawí ku ja nja'ejxpaaqtwa'añim; jaanim idø'øn ja wyinaty øy wa'ats n'ijxyim. Ka'ap øts ixyam tuki'iyyi nnijawi,

jaanim øts ja nøjkx wa'ats yikxon nnijawinim tuki'iyi sám øts ja Dios ixyam wa'ats x'ixy wa'ats xnijawa'an. ¹³ Jade'ents idø'øn ku n'ajot'ajtin ja Dios, ku njøp'ejxin ja nitso'ok'ajtin, uk ku nmøøt'ajtin ja tsojkin ja pa'ayo'owin, nimidi mibaat kyagudigøy, ettip yø xemikøjxp; tigajtstipts idø'øn niðu'ukjaty, yø tsojkin yø pa'ayo'owin yø ne'egi tyimyjawaani møj, nigidi yø yjadu'ukpi jade'en myajada'akti.

14

Ja kawinaaq ayuujk kanimadooni

¹ Kajaats idø'øn xmøøt'attit ja tsojkin ja pa'ayo'owin, amidowdi poktsowdi jøts ja Dios myikwejidit myikajidit, ja'ats jawaani m'amido'odip sudso ja Dios kyajpxy y'ayuujk xnigajpxidit. ² Pø ja Diosxi ja ja'ayi myigajpxpy pøn ja wenk aaw wenk ayuujk tkajpxp, ka'axi ja myigu'uk ja ñimadøyi. Ja Dios Espíritu Santo ja jayik'awejmiyip, ka'apts ja yiknimadøy ti ja kyajpxpy, jøts ti ja jade'en tyijpy. ³ Abikyts ja'amidi pøn ja Dios kyajpxy pøn ja Dios y'ayuujk tu'ugyi tyimdyunk'ajtmiyidip jøts ja ttukmadowdi ja ja'a'y pøn tpabøjktip ja Dios jøts ja yjanchja'win ja myøkta'aktit ku ja yikajpxjot'amøjkidi. ⁴ Nadyu'uk ja yjanchja'win ja tyikmøji tyikaja'aji pøn ja myigu'uk kanimadooji pøn ja tjakajpxy ja wenk aaw wenk ayuujk; pønts tnigajpxidip ja Dios kyajpxy ja Dios y'ayuujk jøts ja ttukmadowdi ja ja'a'y pøn tpabøjktip ja Dios jøts ja jade'en tyikmøjyidi tyikajaajiyidi ja yjanchja'windi.

⁵ Njadamidsøjkpy meets jøts kawinqaq ja wenk aaw wenk ayuujk xkajpxtit; jawaani kajaats mee ndamidsøky jøts ja Dios kyajpxy y'ayuujk xnigajpxtit, ja'axi ne'egi jawaani møj bump; ja bump jeexyip nayide'en pøni yiknimadoop jeexyip pøni ti dø'øn yikajpxp yiknimadyakp wenk aaw wenk ayuujk, jøts ku jeexyip yikxon yiknigajpxy tu'uk tu'uk ti jade'en tyijpy, winetimts ja tiy myøjiyidit mya'ayxiyidit ja yjanchja'win pøn jaty tpabøjktip ja Dios. ⁶ Pøni n'ats'ijxpy meets jøts meets ja wenk aaw wenk ayuujk ndamigajpxt, ka' meets ti pudøjkin jade'en nmo'ot. Kuts øts ja nnigajpxt midi ja Dios xuknija'wa'amp, uk ja' midi tiy midi øy, uk ja Dios kyajpxy y'ayuujk mee ndukmadøøpy jøts nda'awa'andit, ja'ats idø'øn ti mjanchpudøkiyidip.

⁷ Wan ja ejxpajt t'ukpiktaqjkyim. M'ijxy'ajttipxi xuujx sam ja kapxyuuujx uk ja kow; pøni ka'ap nyiksuuni:pajtym, sudsots ja'a'y ja tja'gyukit pøni ti yikoop, pøni ti yikxuxp. ⁸ Kuts ja ja'a'y cheptumidi ku ja puxuujx wa'ats kyawinqaq'ñ, ka'ats ja tsep pøn t'a'ejxi. ⁹ Nayide'ents meets idø'øn mjaty; pøni ka' meets ja ayuujk xkajpxy midi yiknimadoop, ¿sudso dø'øn yiknijawit pøni ti dø'øn mgajpxtip? Ja poj mee nugo mmigajpxpy! ¹⁰ Janch jaa dø'øn may ya naqwiiñ ja ayuujk tigach, jøts tyumnimadoodip ja' pøn ja'abi ayuujk tkajpxtip. ¹¹ Pøni ka'ats ø nnimadøy ja ja'a'y pøn ja wenk ayuujk tkajpxp, wenk kugajp ja'a'ysts øts ja xejt, jøts nayide'en øts ja ndejmit. ¹² Pøni mjanchtajotigødyip idø'øn jøts ja kunuu'kxwyejin jøts ja kunuu'kxkyajin xpaaattit x'ejxtit, ja' dø'øn mmijotigø'ødyip midi mdabudøkidip ja mmigu'uk

jøts ja yjanchja'win ja myøjidit kyajaajidit.

13 Paty idø'øn ja jaa'y t'amido'ot ja Dios jøts yikwejit yikajit sudso ttuknimado'ot ja jaa'y pøni ti dø'øn ja kanimadooni ayuujk tyijpy. **14** Kuts ja wenk ayuujk njadakajpxa'akt, ka'ap øts ja nnimadøy pøni ti ngajpxpy øy øts ja ngajpxaqjkin yjatiyi. **15** ¿Tits øts idø'øn njaaktu'ump? Njayiktuñ øts ja wenk aaw ja wenk ayuujk ku ø n'ajot'att uk ku øts nwìn'øøl ja Dios, ja' ja'ayi tsojkip jøts ku øts nmøøt'att ja ja'gyukin ja madogukin. **16** Sudso meets ja mmigu'uk mnimadowiyit pøn ja wenk ayuujk tkajajttip pøni wenk ayuujk tam meets ja Dios mda'ajot'ajtpy. Kuts ja ka'ap tnimadowidi sa jaty mee mwa'añ øy meets ja amuki møøt xja'ajot'aty ja Dios, ka'ats ja tja'gyukidi sa meets ja Dios xnøjmi. **17** Øy meets ja mdsapkajpxy mabaat yja'oyi, kuts ja ka' yiknimadøy jade'ents ja tpaatty ku meets ka' ti pudøjkin xmø'øy ja mmigu'uk pøn tkanimadoodip ja'abi ayuujk, jøts ja jade'eñi y'etti, ka'ap ja yjanchja'win myøwenidi kyajaajidi. **18** Ngajxajkpy øts ja Dios ku øts ja kawinaak xuka-jpxy ja wenk aaw wenk ayuujk midi mee ka' xka-jpxy. **19** Kuts ø ngajpxy jøts ø n'awa'añ ja jaa'y pøn jaty Dios tja'myajtstip, magoxk aaw øts ja'ayi ne'egi ngajpxy ja ayuujk midi yiknimadoop jøts ka' kawinaak mil ja ayuujk midi kyayiknimadoop.

20 Migu'uktøjkti, ku ja ka'øybi ku ja pøky xpaattit, jade'en mnabyikta'agidit kidi mutskuna'jk ti kyamayidinim. Kuts mwìnma'adyit, jade'en mwìnma'adyit sam møjaaq'dyøjk yikxon wyinmaadya'an. **21** Yide'en jap wyø'añ nøky ja kutujk: "Wenk aaw wenk ayuujk øts

nyiktunkpaatp ku øts ja naxwii'ñit jaa'y øy mädsoo nmigajpxt, uk ndanigaxtit øts ja' ja wenk ja'a'y midi wenk pujx wenk kajp tso'ondip jøts øts ngajpxy jøts øts n'ayuujk ja xyiknajxidit, njade'ents øts ja naxwii'ñit jaa'y nøjkx xkamibøkti, jade'en wya'añ ja nwindsøn'ajtim." ²² Ejxpajtxi dø'øn jayikmøødyip pøn jaty tkamibøjktip ja Dios ku dø'øn ja wenk ąaw wenk ayuujk xkajpxti jøts ja Dios ja tmibøjktit, kidi ja'ajip ja jade'en kyujajtip pøn tø tmibøjknidi ja Dios. Abiky yja' ja'amidi ku Dios nayide'en myø'øyidi ja ejxpajt ku ja yikxon tyukjatyidi sudso ja tnigajpxidit ja kyajpxy ja y'ayuujk, kidi ja'ajipts ja jade'en tyanibiktaajkip pøn tkamibøjktip ja Dios. ²³ Kuts mee níduki'iyyi mnamyukit jøts mjamadya'aktit jøts tum tigach ja m'ąaw m'ayuujkti, jøts nípøn kyanañimadowidit, kuts ja jaa'y pøn ja Dios tkanija'widipním jam tyøkidit ma mee mnamyukyidi jøts ja niti nayide'en tkanimadoomidit, ɿka' meets idø'øn ja mo'tpi ja'a'y mdejit? ²⁴ Pøni mgubajtiyipts meets ja jaa'y jøts ja tmadøy ku meets ja Dios kyajpxy y'ayuujk xnimadyaajki, pyawinmagyøjxpts ja chinąa'yin ja' jøts pyøky ja tjawit ku ja tmado'ot jøts kudam ja yikpøky'ixy. ²⁵ Jade'ents ja Dios ja tjanchjawit jøts ja tyiknigaxø'køxt pøni sa jaty ja tø chøøni, jøts ja Dios tmøjpikta'akt kuxani, jøts meets ja mnø'ømxit jøts ku meets ja Dios jam xmøøtsøøni.

Tundi tuki'iyyi tsuj, jøts tum tanibiktaagi sam pyaat'atyi

²⁶ Yide'en me migu'uktøjk idø'øn yjawi xuñ ku mnamyukyidi. Jam niwinaagin pøn ttunk'ajttip ja øøk, jøts niwinaagin y'awa'aandi, uk ja'ats

ja ñigajpxtip pøni sa ja Dios kyajpxy y'ayuujk wya'añ; jamts niwinaagin kya'amaamyidi, wenk aaw wenk ayuujk ja yiktundip, jamts pøn tkajpxnajxtip ja wenk aaw ja wenk ayuujk. Øy'ajtp ku jade'en xundi, nugo ku xja'myatsti jøts ku nayide'en ja mjanchja'win xyikmøjidi.

²⁷ Ku ja wenk aaw wenk ayuujk xkajpxtit midi kanimadooni, namajtsk nidigøøk ja'ayi mgajpxtit jøts niðu'ukjaty; jøts kuwañi tu'uk tkajpxnaxt ja ayuujk. ²⁸ Pøni ka'ats jam pøn, pøn ja ayuujk tkajpxnaxp, ka'ats ne'egi ja wenk aaw wenk ayuujk xkajpxtit, kinadyu'uk ne'egi ja Dios xmøøtmadya'aktit. ²⁹ Nayide'ents xu'undit pøni mnigajpxwændip ja Dios kyajpxy ja Dios y'ayuujk, nayide'ents namajtsk nidigøøk ja'ayi mgajpxkojtit, jøts nayide'en niðu'ukjaty, pønts kakajpxtip wants ja ja'ayi tpatmadowdi jøts t'ejxti pøni tøøp uk ka'tiyi. ³⁰ Pøni wyinmaaq'nmyøøpyts ja Dios tu'uk ja ja'a'y midi jam patmadoop, wants ja tkajpxmi jøts ja y'amo'ont pøn ukajpxp. ³¹ Jade'ents mee mgajpxt niðuki'iysi pøni winmaaq'nmyøøjyidip ja Dios, jøts jade'en xem yam mnank'y'ixpøkidit jøts mnagyajpxjot'amøkiyidit. ³² Tuda'aky idø'øn, tsuj idø'øn ja kyajpxtit pøn ja Dios kyajpxy y'ayuujk tnigajpxidip, ³³ jabi ja øy'ajtinxi ja jotkujk'ajtinxi ja Dios chøjkpy, ka'ap ja tsep, ka'ap ja nugo o pøngapøn ttatøkit ja madyaajkin.

Nayide'en meets idø'øn xu'unt sam niðuki'iysi ma jaty ñamyukyidi ja janchja'wibi ja'a'dyi midi adøm nmigu'uk'ajtyindip. ³⁴ Ka'ap idø'øn ja tø'øxyøjk xyikajpxtit ku mnamyukidit, po ka'axi jade'en kyutukyi. Mbadu'undip idø'øn ja kuwañi sa ja Dios

kyutujk wya'añ. ³⁵ Pøni yiktoøwøndip tigati, jam tyøjkjotp tyiktø'ødit ja ñiyaa'y; ka'axi y'øgyaxi'iky ku tø'øxyøjk kyajpxy mä mnamyukyidi ku Dios x'ajot'attì.

³⁶ Ja'myatsti migu'uktøjk ku meets jawyeen ka' y'ijty xnijawì ja Dios kyajpxy, jøts ku mee ka' nadyu'ugyi xnijawì ya'atpi ayuujk. ³⁷ Pøni jam tu'ugin tjawì ku tnijawì sudso ja Dios kyajpxy y'ayuujk tnigajpxit, uk tø tjawì ku ja Dios Espíritu Santo tø wyinmäa'nmyø'øyi, paat'ajtip jøts tja'gyukit ya'atpi ayuujk midi meets ixyam ndaniguejxpy jøts ku nwindsøn'ajtim yø tkutujki. ³⁸ Pøni ka'ats ja tkutujkjawi, ka'ats ja nayide'en ja ejxkajpin pyaat'atyi. ³⁹ Jade'en migu'uktøjkti, jotmay'attì sudso ja Dios kyajpxy y'ayuujk xnigajpxidit, jøts kidi xpayø'ødyi pøni kyajpxtip ja jaa'y ja kanimadooni ayuujk; ⁴⁰ tum øy tsujts idø'øn ja xu'undit, ka'ap anaxukpim.

15

Ku ja Cristo yjukpyijk yadigojk

¹ Ja' migu'uktøjk ixyam ndukja'myatswøndip midi tø njanigajpxmi, ja Dios ñitsoojkin ayuujk. Ya'at kajpxy ya'at ayuujk meets idø'øn tø xkupiky, jøts nay yø' meets idø'øn ixyam mdsinaa'yin'ajtpy.

² Ja'agøjxp meets idø'øn nayide'en ja Dios myiknitsø'øgyidi, pøni mbadundip idø'øn midi tø ndukmadowdi, jøts pøni tu'ugyi dø'øn ja mjanchja'win xyikyø'ødyi.

³ Ja' meets idø'øn tø ndukmadøy midi ø nayide'en tø nyiktukmadøy. Tø mee nda'awa'añ ku adøm ja Cristo tø xku'o'jka'am, ku adøm

nbojkpitumbijaa'y'ajtyindi sam jap nøkyijxpy yjaabyetyi jøts jade'en ja wyq'añ; ⁴ jøts nayide'en tø ndukmadowdi ku tyikjutøkjidi, jøts ku ja kyimidigøøk xøøw yujkpyijkky sam nayide'en ja nøky tnigajpxmi; ⁵ jøts ku ja ojts jadigojk ñankyl'ijxyiyi yam ja tø yja'oo'kni jam Pedro wyindum, ja' ja ojts t'ixy jøts jadigojkøjmyi ma ja kyudanaabyitøjk jam wyinatyi. ⁶ Jøts nimagoxk magøpxñaxy ojts y'ejxmiyi ja janchja'wibi jaal'y tuktøñi, may nay jaa yujkyl'attinim winaagin tø y'oooknidi. ⁷ Jøts ojts y'ejxmiyi ja Jacobo midi Santiago yiktejp, jøtsnim níduki'iyi ja kyudanaabyi ojts y'ejxkøjxmiyi.

⁸ Jøtsnim ø tyimy'ix'oojk nayide'en tø n'ejxmi, øy øts idø'øn øy tsuj tø njagatso'onda'aky n'uktejint sam ja'adi. ⁹ Ja'agøjxp øts idø'øn øy ngamøji ngakøjxpi, pø øtsxi dø'øn ñamyayi jawaani mutsk wimbidsømp, ka'ap øts nayide'en sam ja nwindsøn'ajtim kyudanaabyidi, jøts ni xjagapaat'aty øts jøts ø nwindsøn'ajtim kyudanaabyi nyiktejt, jabi ka'axi øts y'ijty nmaa'kxti pøn jaty tjanchja'widip ja nwindsøn'ajtim. ¹⁰ Tøts øts ja Dios xjanchmi'øyat, ja'agøjxpts øts ixyam jade'en njaa'y'aty pøni sa øts ja tø xamidsøky, tøts ja chojkin ja ngupøjki, ka'ap øts ja nugo tø xanax. Tø ne'egi jawaani kajaa nduñ sam ja tø tkatundi ja nmigudanaabyitøjkti; kidi øtsipts kø'øm tø ndyimyajada'aky, ja Dios øts idø'øn ja myøk'ajtin jade'en tø xuktun y'øy'ajtingøjxp. ¹¹ Ka'ats ja ndunk'ajtint pøni øts jawaani tø nduñ, uk tøts ja yjadu'ukpi nwindsøn'ajtim kyudanaabyi jawaani tyundi;

nugo ku øøts tum ja' tø nnigajpxy ja Dios y'øgyajpxy ja Dios y'øy'ayuujk midi mee tø xjanchjawì.

Ku ja oo'kpi jadigojk yjujkpyøktit

¹² Pø njanigajpxpyts øøts ku ja Cristo tø yjujkpyiky jadigojk, ¿sudso dø'øn jam muum wya'andi ku ja oo'kpi kyajujkpyiky? ¹³ Pøni ka'ats ja oo'kpi jadigojk yjujkpyøkti, ka'ats ja Cristo nayide'en tø yjujkpyiky jadigojk; ¹⁴ pøni ka'ats ja Cristo jadigojk tø yjujkpyiky, ka'ats øøts ja ngajpxy tyuñ midi øø ndijpy Dios kyajpxy Dios y'ayuujk, jøts ni kyatumí meets ja mjanchja'win midi mjadsinaadyip. ¹⁵ Kuts idø'øn ja wyinaty janch jade'en, Dios tyestigi ataaayts øø nwimbidsønni, pø tøxi øø nnimy ku ja Dios Teety jadigojk tyikjujkpyiky ja Cristo; pøni tiyts ku ja oo'kpi jadigojk kyajujkpyøkti, ka'ats ja yjanchi ku ja Dios Teety ja Cristo tø jadigojk tyikjujkpyiky. ¹⁶ Pøni ka'ap ja oo'kpi jadigojk yjujkpyøkti, ni ja Cristots kø'ombaat jadigojk tø kyajujkpyiky. ¹⁷ Pøni ka'ats ja Cristo jadigojk tø yjujkpyiky, nitits meets ja mjanchja'win kyawa'añ; nayı mbøkyotp m'ayo'onjotp mee mdsønni. ¹⁸ Pøni jade'ents ja', tøts inet idø'øn tyimy'oo'kti pøn jaty ja Cristo tø tjanchjawidi ku tø yjujky'atti. ¹⁹ Pøni yayi adøm njøp'ijxy'ajtyim ja Cristo ñitsoojkin jøts ja nayı yayi ndajujky'ajtint næxwiiñ, ti adøm n'ayøøy, adøm ne'egi yikxon ayo'ijxyim jajtim, nigidi pøn jade'en ku adøm jade'en n'adøjtsin.

²⁰ Ka'ats ja yjade'eni, tø dø'øn ja Cristo tyimyjanch jadigojk yjujkpyiky; ja' idø'øn kø'øm midu'uk tø ttunjøpi, jøts idø'øn wyinaty nayide'en yjujkpyøkti ja abiky oo'kpidi. ²¹ Pø tu'ukxi ojts

ja ja 'y ja o'jkin tyiktso'onda aky ya n xwii , nay  tu'ukts ja' p n ojts tyiktso'ondakmi j ts ja oo'kpi jadigojk yujkpy kt. ²² Jade'en sam n duki'i i ja o'jkin yikpa aty Ad n py kyojxp, nayide'ents wyinaty n duki'i i ja jujky'ajt n xemikojxp yikmo'odi p n ja Cristo tjanchja widip. ²³ Tanibikta agits id 'on ja wyinaty ja xemikojxpit tsin  a 'yin nyikm 'oyindi. Ja Cristo jawyeen p  ja'axi jawyeen t  yujkpyiky; kuts ja Cristo mye'entnim jaanimts wyinaty yikmo'odi ja tsin  a 'yin xemikojxp p n jaty ja t  yjanchjawiy . ²⁴ Jats id 'on wyinaty tuki'i i kyixy, ku ja Cristo wyinaty tyikudig ogyixy n duki'i i p n jaty jaa winds n'ajttip n xwii , j ts p n wyinaty yikutujktip, ana'amdi , p n tmidsep'ajttip ja Dios; j ts id 'on ja Cristo wyinaty ja Dios Teety ttagid jkigyijxy tuki'i i wine'enin ja tja'aty. ²⁵ P  jaanimts id 'on ja Cristo wyinaty kuwan i yikutuky kunim ja myidsep ttekpya'an'ajtk xt, ku ja Dios Teety ja jade'en wyinaty t  tyamids kyi j ts ja myidsep ja tm majada'akt, ²⁶ j ts ix'oojkn m ja o'jkin ja Cristo t'u km majad knit ku ja jujkpy jkin tyikn xkida'akt. ²⁷ P  t xi ja Dios Teety tts ky j ts ja Cristo tuki'i i tyikutukt. Kuts id 'on ja n ky jade'en yjawa'a , ka'ap id 'on ja Dios Teety tyagid ag iy  j ts ja Cristo ja yikutukiy t, p  ja'axi t  tts ky j ts ja Cristo tuki'i i tyikutukt. ²⁸ Kuts id 'on ja Cristo wyinaty tuki'i i t  tm majad kixy, winets ja wyinaty ja Dios Teety kyutujk tkup jkti, p  ja kuxi ja Dios U'ngi. J ts id 'on jade'en ja Dios Teety my jkutujk o m  ds oo w yingax 'okt p n ja Dios U'nk t  ttamids ky j ts ja myidsep ja n duki'i i

tmimajada'akt.

²⁹ Jam yjawi pøngapøn ja oo'kpi tkunøbatti. ¿Tigøjxpts ku jade'en m'adø'øtsti? Pø nømdipxi ku ja oo'kpi kyajujkpyøktit jadigojk, ¿sudsots ja xkunøbatidi?

³⁰ ¿Ti øøts jeexyip ndamidanaapy ja ayo'on ku øøts njemjaty ndejaty, pøni ka'adam ja yjanchi ku jadigojk njukpyøjkint? ³¹ Janch ø migu'uktøjk idø'øn nwa'añ, wingon øts ja o'jkin jabom jabom n'ixy; ka'ats øts ja nwandijy, ja'ayi øts nugo ndyimdyajotkujk'ajtpy ku meets ja nwindsøn'ajtim Jesucristo tø xjanchjawidi.

³² Pøni kajpxwamp øts, nø'ømp øts inet ku øts ja ja'a'y jawaani xkayikpa'oookti jam Efeso. Tøts øts ja nmimajada'akti, ¿tit øts idø'øn jade'en nbijkpy? Pøni janch tiy idø'øn ku ja oo'kpi jadigojk kyajujkpyøkti, jade'ents ne'egi ndu'unindit sam wya'andi: “Wants yikxon tjaaktyimkyaa'yindi tjaaktyimy'uujkyindi ixyam jabi o'jkindipts jabom.”

³³ Nay'ejx'etidim jøts mgayikwin'øøndit. Sam ja kajpxy wya'añ: “Ja kø'øm ka'ømyigu'uk idø'øn kayu'kxtip pøn tyikma'ttip ja myigu'uk chinaa'yindi.” ³⁴ Yiktso'onda'akti jadigojk tiy tsuj ja mdsinaa'yindi, kidi pøky x'uktunk'ajtnidi, pø ka'axi xumnijawidi ja Dios. Paty øts yide'en nwa'añ jøts xtsøl'ødyunjawidit ja mga'øwyinmæa'ñ.

Saq dø'øn ja oo'kpi jadigojk yujukpyøktit

³⁵ Jamts inet muum mæ tyiktø'ødit: “¿Sudso dø'øn jadigojk ja oo'kpi yujukpyøktit? ¿Saq dø'øn ja ne'kx wyinaty t'ixy?” ³⁶ ¡Xøjknat! ¿Ku me tigati x'ukni'ipy, nay ja tømt idø'øn pidsømp ku ja

myuxy? Kuwanixi ja kyudigøy jøts ja ujts myuxy.
³⁷ Ka'axi ja tømt pajk tyimñayide'en t'ixy sám ja ujts midi muxp, øy yja'ariindømt pajki, uk yjamidi tømdi. ³⁸ Ja Diosts ttanibiktaaqkip jøts ja tømt pajk myuxt pøni sá ja ttsøky, jøts pøni sá dø'øn pyaqat'atyi ja tømt midi yiknejp. ³⁹ Tumdigachxi tuki'iyyi t'ixy tigati; wenk ja jaal'y ñe'kx t'ixy jøts wenkts ja jiuyjk ñe'kx t'ixy, wenk nayide'enmi midi ja kyajnk jamdi, jøts wenk ja ajkx ñe'kx. ⁴⁰ Jats ja ne'kx midi tsajpjøtpyit'ajttip jøts naya ja'amidi midi naxwiin'ajtmidip; midits idø'øn tsajpjøtpyit'ajttip, wenk idø'øn ja chujidi, ka'ap ja nayide'en kyaxø'økti sám ja'adi midi ya tsuj naxwiin'ajttip. ⁴¹ Wenk yø xøow tyii'kxy, wenkts yø po' chamami; jøts nayi wenk yø maqds'a: tyøø'kxmidì, jøts tigajtstip yø maqds'a:, wenk yø tyøø'kxti tu'uk tu'uk. ⁴² Nayide'ents idø'øn yjaty ku oo'kpi jadigojk yujkpyøkti. Putsnip ja' midi ñe'kx yiknitajp, jøts midi ñe'kx jadigojk jujkpyøkp nijuunits idø'øn ja kya'uk'oo'knit. ⁴³ Ja' yiknitajp midi yiktatsø'ødyump, jøts yujkpyiky midi janch-taxonda'akyim xemikøjxp. Ja' yiknitajp midi' kamøk, midi kamajadakp, jøts yujkpyøkt jadigojk midi janch møk møjaaw. ⁴⁴ Ja ñe'kx yiknitajp midi yikwin'ejxp jøts midi yiktomp yikmajtsp; jøts ja ne'kx yujkpyøkt jadigojk midi kayik'ejxp, kayiktomp, kayikmajtsp. Pøni jats ja ne'kx midi yik'ejxp jøts y'øky tyigøy, nay jats ja ne'kx midi kayik'ejxp midi ka'oo'kp kadigøøpy.

⁴⁵ Jabi yide'enxi ja Dios kyajpxy wya'añ: "Ja'ukyikmøøyxí ja mijawyeen jaal'y ja jujky'ajtin, pøn idø'øn Adán'ajt"; ka'ats ja

nwindsøn'ajtím Jesucristo yjade'ení sám ja Adán y'ijty, tyimyikujky'ajtpí ja ja'ayí myiñ. ⁴⁶ Jawyeents adøm ja ne'kx tø nyikmø'øyim midi ya nmøøt'ajtyindip naxwiiñ; jøtsním wyinaty ja ne'kx nyikmøø'yindi sám ja nwindsøn'ajtím ñe'kx t'ijxy ku ja yujukpyijky jadigojk. ⁴⁷ Naxne'eyxi ja Adán ñe'kx'ajt naxwiiñ'ñit jaa'yin; tsajpjotpts ja myiñ ja nwindsøn'ajtím Jesucristo ñe'kx paty ja jawaani øy. ⁴⁸ Tum jade'ents adøm nne'kx ya naxwiiñ t'ijxyim sám ja jawyeen jaa'y ñe'kx t'ijxy, midits idø'øn wyinaty yikmø'øyimp jade'ents ja t'ext sám ja nwindsøn'ajtím ñe'kx. ⁴⁹ Nayide'en sám adøm ya naxwiiñ tø n'agojnajxyim ja midu'ukpi jaa'y, kuts jam tsajpjotp nayide'ents adøm nøjkx nwimbijtyim sám ja nwindsøn'ajtím t'ixy.

⁵⁰ Yide'en ø migu'uk idø'øn njatijy ku yø ne'kx midi nmøøt'ajtyindip midi xixmyøøt midi ni'jpmyøøt, kidi yø'øjip wyinaty twinguwa'jkíp ja Dios ma ja amuum ja kyutujk ttanitanit ja jaa'y; midi kataq'anip, midi oo'kp tigøøpy, ka'ap ja pyaqt'atyí jøts ja xemikøjxpit jujky'ajtin yikmo'ot. ⁵¹ Ja'ats meets ndukmadoowamppy jøts yikxon xnijawidit midi yu'uch, midi amaa'tsk ejtp, midi ka' pøn nugo ajawi tnijawi: Ka'ap adøm níduki'iýi ja o'jkin nbäajtindit; ja'ayi ku tyumdigatst ja ne'kx ku nøjkx ja nwindsøn'ajtim xnimi'iñim, ⁵² widsukin idø'øn ja tyunit, ku ja puxuuqx jadigojkyi yjaak'ukyikmadoonit. Winets idø'øn ja oo'kpi yujukpyøktit jadigojk møøt ja ñe'kx midi xemikøjxp myiujuky'attip; pønts wyinaty jujky'ajtipnim ja'ats ja ñe'kx tigatstip. ⁵³ Kuwanixi

dø'øn tyigatst yø ne'kx midi adøm ya naxwiiñ nmøøt'ajtyindip, midi amøjip, midi køjxp, midi anuu'kxip; jøts ja nyikmø'øyint midi xemikøjxp etp ja'agøjxp ku ja kyakixy ni kya'amøji. Jøts adøm wyinaty nmajtstuujtyim ja ne'kx midi oo'kp midi tigøøpy, jøts ja nyikmø'øyint midi nijuuni ka'oo'kp midi xemikøjxp ejtp. ⁵⁴ Kuts adøm idø'øn wyinaty tø nmajtstuujtyim ja ne'kx midi kajajkp, jøts wyinaty ja ne'kx tø nyikmø'øña'am midi jajkp, jøts ku dø'øn wyinaty ja ne'kx tø nmajtstuujtyim midi oo'kp jøts wyinaty tø nyikmø'øyim midi xemikøjxp jujky'atp, jaanimts idø'øn ja Dios kyajpxy tyø'øt midi jap jaabyety nøkyijxpy ejtp: "Tø ja o'jkin yikmimajada'aky. ⁵⁵ O'jkin, ¿ma dø'øn ja mduktal'jk? ¿Ma dø'øn ja møk'ajtin tø xyikwingaxi'iky?" ⁵⁶ Ja pøky idø'øn ja o'jkin xukta'oo'kimp, jøts ja møjaaq'gyutujk idø'øn ja tyamøj'ajtpy midi ka'uktunip. ⁵⁷ Ndamøja'wampts ja Dios Teety ku ja tø xyikmajadajkyindi nwindsøn'ajtim Jesucristo pyudøjkingøjxp.

⁵⁸ Jade'ents migu'uktøjk idø'øn, møk jøts tu'ugyi ja mwìnmaaq'ñ xjaaqpiktakojtit jøts ja nwindsøn'ajtim tyunk xjaakyikyø'øgyoitit; pø mnijaq'widipxi ku ka' nugo wyindigøydi ja mdunk midi ja nwindsøn'ajtim mduktuujuñidip.

16

Saqja pudøjkin myukt

¹ Ku xyikmuktit ja pikta'aky midi mdabudøkidip ja abiky kugajp ja migu'uk midi tjanchja'widip ja Dios, yiide'en xu'undit sám ø nayide'en tø ndukmadowdi pøn jaty jam Galacia etjotp

namyujkidip. ² Kija' idø'øn windomingi xpukondu'uttit ja mijuu'ñ pøni wine'en tø mmajadålakti, jøts ja xpøkjø'øktit a'ejxi, jøts wyinaty abaqadı xyik'awejxnidı ku ø nnøjkxt. ³ Kuts øts jam wyinaty nnijkxy winets ø wyinaty nguexy ja jaa'y jam Jerusalén pøni pøn mee mwii'ijxpy, jøts øts ja nøky ja nmo'odit jøts ja møøt tyiknøjkxtit ja pudøjkin. ⁴ Pøni paat'ajtiyip jøts ø nnøjkxt, øyts øts ja wyinaty xmøøtnøjkxti.

Ku Pablo tnigajpxy ma jaty ja wyidetwa'añ

⁵ Kuts jam wyinaty nnijkxy ma meets jam, jawyeen ø nnaxwaa'añ jam Macedonia etjotp, jøtsnim øts jam Corinto wyinaty njaa'ty. ⁶ Ni kyajaa øts jam yjawi ndaa'nit ma meets jam, jotmøñ øts jam nyiknaxy ja xuxpyoj jøts mee nayide'en wyinaty x'atskexy ma ø wyinaty nnijkxy. ⁷ Ka' meets idø'øn nugo pojın n'ukninaxwaa'añ, nmøøtqa'añwyampy meets idø'øn niyjeky pøni yikutujkpy ja Dios. ⁸ Yam øts Efeso kajpkøjxp njaaktaa'añwyaa'ñ kunim Espíritu Santo xøøw tpøatt. ⁹ Øy øts idø'øn may ja jaa'y xjamilekyidi ya Efeso kajpkijxy, jats ja jaa'y nayide'en pøn ø xmadowandip jøts øts ja ndukmado'odit ndukyikyujtit ja nwindsøn'ajtim Jesucristo yja'.

¹⁰ Pøni ja'tp ja Timoteo jam, m'ejxtibim jøts jotkujk jam ñayjawiyit jøts niti tkadajotmay'oookt, pø nayi nwindsøn'ajtimxi yja' ja tyunk'ajtip sam øts. ¹¹ Paty idø'øn ja tum jade'en xkupøktit, jøts jade'en xpudøkidit jøts øts øy tsuj yam xpaatt, pø n'awijxpxi øts ja yam møøt ja myigu'uk pøn møøt wyidity.

12 Tøts øts Apolos njanchjaminuu'kxaq'aky adøm ja nmigu'uk jøts ja jeexyip tmøøtnijkxy ja migu'ukti pøn jaty meets m'ats'ejxwajnip, ka'ats ja ixyam inet myajada'akt; jaanim ja ñøjkxt ku y'awatsit.

Ku ja Pablo t'ukyajknja kajpxpoo'kxin

13 Wijyim mnabyikta'agidit jøts ejtp mør ja mjanchja'win xyik'ettit. Yaa'dyøjkin tuki'iyyi xmídanidit jøts jotmør mnabyikta'agidit. **14** Pøni ti jaty mdundip, tsojkingøjxp pa'ayo'owingøjxp ja xu'undit.

15 Mnija'widip migu'uktøjk ku dø'øn ja Estéfanas mør ja myigudøjk jawyeen tjanchja'widyi ja Dios kyajpxy y'ayuujk jam Acaya etjotp. Tøts ja ñadyamiyøxyidi jøts ja tpudøkidit ja jaq'y pøn ja janchja'win tmøøt'ajttip nayide'en.

16 Pøni jade'ents ja tyundi, nayide'ents mee mbaat'atyi mdu'un, jade'ents ø ndsøky jøts meets ja xmimado'ot jøts ja nayide'en xpudøkidit, nayide'en xu'undit ja jaq'y pøn jaty tundip pøn jaty pudøjkidip. **17** Tøts idø'øn njanchtajotkujk'atti ja Estéfanas, ja Fortunato jøts ja Acaico ku ja ya tø y'atsmendi jøts ø tø x'atspaætti, ja'ats øts ojts ja pudøjkin xmo'odi jøts meets jade'en myikudanaqay. **18** Tøts idø'øn ja xjanchyikjot'amøkpøkti sam ja jam nayide'en myikjot'amøkpøjkidøø. Ngajxajkimp idø'øn ja yjade'embí jaq'dyi.

19 Mdanigajxidip ja kajpxpoo'kxin ja janchja'wibi jaq'dyi pøn kugajp'ajttip Asia etjotp. Mjanchkajpxpoo'kxitip ja Aquila jøts ja Priscila, jøts nayide'en niduki'iyyi ja jaq'dyi midi xuminamyujkidip ja' tyøjkjopti, pøn nayide'en tø tjanchjawidi ja Dios sam meets. **20** Nayide'ents

mgajpxpøø'kxyidi pøn jaty yam tø tjanchjawidi ja Dios. Nagyajpxpoo'kxiidi niðuki'iysi xem yam sam ja Dios ttsøky'aty.

²¹ Pøn idø'øn Pablo'ajtp, øts idø'øn kø'øm njaapy ya'at nøky jøts ndanigaxidi ya'atpi kajpxpoo'kxin.

²² Pøni ka' pøn tkupiky jøts tkatsøky ja nwindsøn'ajtim Jesucristo, wan wyinaty kø'øm ttani'ixy. ¡Wingonip ja nwindsøn'ajtim!

²³ Mmo'ojidip ja nwindsøn'ajtim ja kyunuul'kxin.

²⁴ Meets niðuki'iysi ndanigajxtip ja tsojkin ja pa'ayo'owin Cristo Jesús køjxp. Jade'en idø'øn ja yjatt.

**Ja øgyajpxy ja ømyadya'aky midi xukpaajtimp
ja nits'o'ok'ajtin
New Testament in Mixe, Tlahuitoltepec
(MX:mxp:Mixe, Tlahuitoltepec)**

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mfp], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Tlahuitoltepec

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
422dcf73-46a5-5403-b423-8406ed76ac1d